


बाख

(शुक्रवार - अष्टमि पर्व)
जुलै - २००७



कोंशिर अछरमान

(Kashmiri Alphabet)

अ	-	आ	।		
ऐ	ॐ	ऑ	ॐ		
अु	ॐ	अु	ॐ		
इ	ि	ई	ी		
उ	ॐ	ऊ	ॐ	(ऋ)	ॐ
ऐ	ॐ	ए	ॐ	ऐ	ॐ
ओ	ॐ	ओ	ॐ	(औ)	ॐ
अ्व	ॐ	अ्य	ॐ	अं	
क	ख	ग	(घ)		
च	छ	ज	(झ)		
च	छ	ज़			
ट	ठ	ड	(ढ)	(ण)	
त	थ	द	(ध)	न	
प	फ	ब	(भ)	म	
य	र	ल	व		
श	स	ह			
(क्ष)	त्र	(ज्ञ)			

Note:

letters placed in brackets are used only in certain proper names e.g. औरंगाबाद, रघुनाथ, झारखंड, भद्रवाह, कृष्ण, धनवंती, क्षमा, ज्ञानेश्वर । etc.

(साहित्यिक मैगज़ीन)

जुलय 2007

अक्षर माला

(संक्षिप्त कापी)

Alphabets

१००९

वाख-7

(तुर्यतवार साहित्यिक मैगज़ीन)

जुलय 2007

व्यवस्था

रूपकृष्ण भट्ट (प्रबंध)

राकेश पंडिता (व्यापार प्रचार)

राजेंद्र प्रेमी (समन्वय)

सलाहकार मंडल

शंभुनाथ 'हलीम'

अर्जुनदेव 'मजबूर'

शशि शेखर तोशखानी

ओमकार कौल

सहायक संपादक

प्रेमनाथ शाद

संपादक

रतनलाल शान्त

वाख- 7

त्रुत्यतवार साहित्यिक मैग्जीन

जुलय 2007

प्रकाशक

आल इंडिया कश्मीरी समाज

(एआईकेएम)

डी-90, सरोजिनी नगर,

नॅव दिल — 110 023

ई—मेल : aiksnd@rediffmail.com

संपादकीय पताह

904—सुभाषनगर,

जम्मू—180005

फोन : 094196 - 84914

0191 - 2586033

e-mail : rishant@rediff.com

© सर्वाधिकार सुरक्षित

यथ पत्रिकायि मंजु प्रकाशित लेख वर्गारु इस्तिमाल करनु ब्रोड गलि लेखक, अनुवादक तु एआईकेएसक इजाजत जरूर हयनु युन।

कुनि नि (प्रकाशित) लेखस मंजु जॉहिर करनु आर्माय रायि सुत्य एआईकेएस या संपादक सुद सहमत आसुन छुनु जरूरी।

कवर डिजाइन : गोकल डेंबी

म्वल :	1) अख अंक	: 25 रु.
(देश)	2) सालानु	: 100 रु.
	3) आजीवन	: 1000 रु.
(विदेश)	1) अख अंक	: 4 डालर
	2) सालानु	: 15 डालर
	3) आजीवन	: 150 डालर

इश्तिहार :	कवर सफु	: 10,000 रु.
	अंदरयुम कवर	: 8,000 रु.
	पृष्ठ सफु	: 4,000 रु.
	ओड सफु	: 2,000 रु.
	चववाग सफु	: 1,000 रु.

बंदु सोजुनुक तु विग्यापनु खॉतु पताह :—

एआईकेएस नाद

डी—90, सरोजिनी नगर, नई दिल्ली—110 023

(दिलि नेबुरिम्यन चेकन गछन 40 रु. अलावु आसुनि,

डॉ.टी.पी. : IILS D.D.P. Centre, Shashan Lal Kaul Jammu Collection. Digitized by eGangotri

रिंकु कोल # 94191-36369, 2598633 (R)

वाख-7

(वृत्तयतवार साहित्यिक पत्रिका)

जुलय, 2007

यथ अंकस मंज

ग्यानुमाउग छुय हाक्वॉर : (लेख)

कंशीरि हुंघ केंह अजॉयिवात-2 : गुलाम रसूल बट : 24

कथि मंज कथ : स्तन लाल जौहर : 31

शीन : रोशन लाल रोशन : 36

ज्यतु त्वरुग : (कविता)

गजल-1, 2 : मोती लाल कौल 'नाज' : 41-42

असुवुनि होंजि : बालकृष्ण 'सन्यासी' : 43

बुंज

ग्वडन्युक कुस अख कति रोजान : कुमार अशोक सराफ 'घायल' : 44-45

गजल-1, 2 : मोती लाल 'मसरूफ' : 46-47

परुन स्वलब पालुन द्वलर्ब : (सव्याख्या)

द्यूलिप बाग : पृथ्वीनाथ मधुप : 48

आगउ व्योदुय : (अनुवाद)

अब्यन्यर : अरविंद गिगु : 49

कथा यि कॅरुम च्वर्पोर्य सथ : (कहानियि)

कॅन्य मोहव्युव बुजि जिंदगियि हुद अख द्रह हुदयनाथ कौल 'रिद' : 51

शिवस सोरि नु अतु गथ : (कलासिकल साहित्य)

ललवाख — नोट तु व्याख्या ह्यथ : 59

शिव छुय थलि थलि रव ज्ञान : (सूफी शॉयरी)

तोतु चोलुम हारि

मालु देंय करसे हिये : रहमान डार : 64-65

कथा यि हॉवुम सतुच वथ : (महा काव्य)

प्रकाश रामायनु मंज सिलसिलुवार अंश : 66

ग्वर सुंद वनुन

लाव्यन तजरुबन्न हुंज शॉयिर : ओम कार कौल : 70

कुस मरि तु कसू मारन

शॉयिर प्रेमी युस आजॉदी हुंद सिपाह ओस : 75

स्वखन डुस

‘मतबीद’ सॉबन्य अहमियथ : स्वखानंद : 80


सॉरी समुहव यथ रजि लमहव : (चिठि पॅतुर)

कुमार अशोक सराफ ‘घायल’, मोती लाल कौल ‘नाज़’, रोशन लाल ‘रोशन’
शौकत अनसॉरी, संचित भट्ट : 8

वाख तु वचुन : (एडीटोरियल)

कॉशुर पब्लिशर कति छु? : 19

कवर पेंटिंग
कनवासस प्यठ एकेलिक
चित्रकार तु व्याख्याकार : गोकल डेंवी



पेंटिंग हुंद आदार ललवाख:

च्यथ नोवुय चंदरम नोवुय
जलमय ड्यूठुम नोवुय नोवुय
यनु प्यठ ललि मे तनमन नॉवुय
तनु लल बु नवम नॉवुय छस

The Mind is new, so is the Moon
The vast expanse of water that I have seen is ever new
Since the day I, Lalla, cleaned my body and Mind
I am ever new and new—

यि पेंटिंग छे नीलि रंगुचन मुखलिफ छायेन मंज व्वतलेमुच। अम्युक
केंद्री बाव छु वाखुकिस लफुज 'जलमय'—यस मंज गुपिथ। जल छुनु
न्यूल मगर अम्युक गन्यर तु तथ सुत्य शॉयिरि हुंद तादात्म्य छु अथ
नीलिस रंगस मंज बेहतर व्वतलावान, तिक्याजि न्यूल छु शेहजार,
शाँती तु श्रोत्ररुक प्रतीक। वाखुक केंद्री बाव ति छु अँथ्य बावस अँदय
पँख्य फुहलिथ। लल छि मानान जि तन मन नावन सुत्य छस बु नँव
महसूस करान। नावन खाँतर छु जल जरूरी मगर अथ जलस छु च्यथ
तु चँदरमस सुत्य गोन संबंद। च्यथ ति छु गलान यिजन ललि पानु
बेयिस जायि वोनमुत छु (तँथुर गलि तय मँथुर म्वचे..... च्यथ गोल तय
कँह ति ना कुने) गलुन छु लय सपदुन। चँदरमु छु च्यथस सुत्य नजदीकी
संबंद थवान (चंद्रमा मनसो जातः) चँद्र ति छु गलान (कलायि कलायि
व्यँगलान) यथ शशुकल वोनुख। तेली छु नवि चँदरमुकि व्वदय गछनुक
सामानु सपदान। पेंटिंग मंज छे सादक (खसु 'ललद्यद' छनु) ख्यल
वँथरस प्यठ शबनम कतरुक्य पॉदय तु च्यत लय करनस मंज लीन।
च्यतुच यि यात्रा छे सुखिम छायि तु चँदर—बिंबु मँज्य आकाशस ताम
सपदान येति पां—ओबरस तु हल्कु योसमन रंगु बालु किस बैकग्राउण्डस
मंज शोद सफेद चँद छु। ल्योदुर चँखुर छु च्यथ युस शशुकलि ताम
व्वतलनु किस अमलस मंज छु तु खोवरि अंदु छि अमी यात्रायि हुँद्य
अलग—अलग मरहल। कुल पेंटिंग छे मनुकि शेहजारुच तु च्यतुकि लय
गछनुकि तमि तजरुबुच व्वखनय करान येमि मँज्य शॉयिरि गुजरेमुच छे।

सॉरी समुहन, यथ रजि लमुहन

यथ कालमस मंज छि अँस्य करान पनुन्यन परनवालयन तु लेखन वाल्यन हुंजु चिटि शॉमिल। चिटि गछन 'वाखु' किस कुनि ति पहलूहस मसलन अमि किस स्टैंडाडस, अथ मंज शॉमिल लेखन अंदर प्रकट करनु आमुचि रायि या बैयि कुनि तजवीजस मुतलिक आसुनि। चिटि गछन वेढ्यन अछरन मंज लीखिथ या टाइप कैरिथ आसुनि तु सँही निशानन हुंद इस्तिमाल गछि करनु युन। वं गव अँस्य ह्यकव पनुन्यन बँहलिपायि लेखकन हुंजु चिटि उर्दू हिंदी या अंगरीजि प्यटु अनुवाद कैरिथ ति शॉमिल कैरिथ-सं.

सॉरी रिसालु गँछ्य अँक्यसुय जायि मेलुन्य

येचकॉल्य माहरा ह्युसव चिट्य लेखान व्वमेद छम अरिजुवु आँसिव गुरु—बार तु यार दोस ह्यथ। तुहुंजि जेरि निगरांनी मंज छु 'वाख' ठीख पाँट्य पकान यि छि खुशी हुंजु कथ, मगर मे माहरा छु बासान आमदंनी कम आसनु किन्य छि अँस्य 'वाख', 'क्षीर भवानी टाइम्ज' ह्युव रिसालु कम पहान ब्रोंह पकुनॉविथ ह्यकान — येमि सुत्य तुहुंजु तु त्वहि हिव्यन कदावर कलमकारन हुंजु मेहनत अँकिस खास खेलिस तामय छि वातान। योदवय अँस्य कोशुर समाचारस सुत्य लरि लोर वुसत दिथ वाख क्योहो क्षीर—भवानी टाइम्ज जोरु शोरु सान ब्रोंह पकुनॉविथ ह्यकव, मे बासान त्वहि सारिनय जिद्यन हुंजु मेहनत दियिहे मे हिव्यन वारयाहन व्वछि हत्यन न सिरिफ अदबी ज्ञानकॉरी तु गाशि गन्यर बैल्लिक नवि पुयि मंजु ति यियिहे कौशिरिस तु कँशीरि मुतलिख ज्ञाननुक अख मोक या बहानु। म्योन स्योद पाँट्य मकसद छु जि कौशुर

समाचार, क्षीर भवानी टाइम्स, वाख, व्यतस्ता बेतरि य्वसु ति किताब
ब्योन—ब्योन संस्थायि तैयार करिथ, मेहनत करिथ शोक सान, कुनि नतु
कुनि फिकरि सान तैयार छि करान, त्युहुंद यि चुक यि शोख गोछ
मँजिलस ताम वातुन।

असि छि वाजेह पौद्य सारिनुय खबर, जि काँशुर समाचार छु
काँशुर्यन मंज वारियाहस हदस ताम मकबूल। खुशी हुंज कथ छि अमि
मकबूलियतुक फायिटु ह्यकव अँस्य तुलिथ सारिनुय रिसालन हुंद अकिमुय
जायि सफस प्यठ advertise करिथ। जेमि तु दिलि ह्यकव circulation
बडौवनु खाँतुर किताबन हुंद subscription मँगिथ, यिमेन सारिनुय किताबन
हुंद stockist ह्यकोन मुकरर करिथ। मिसालु जेमि पण्डित सभा ऑफीस,
दिलि Kashmiri Samiti या All India Kashmiri Samaj ऑफीस या नाद
ऑफीस। वँरियंस मंज अख या जु बडि तरजक्य मुशाँयिर या Award
distribution Function करिथ, लुकन मंज बडि खयाल जि काँशुर
समाचार अलावु ति छु अदब बेतरि बराबर छपान। तिम सनन तु केँह
नतु केँह वननु यि अँस्य साँरी यछान छि तिक्याजि अदब छु वुछनु
सुत्य, वनन सुत्य तु बोजनु सुत्य ब्रौह पोकमुत। यि छु म्योन खयाल।

अख खास कथ वोतुम वारयाह कालु प्यठु साँचान स्व छे 'वाख'
योदवय खसूसी नम्बर कडि चूँकि यि छु रियासतु निशि दूर तु खाँलिस
अदबुच कथ करनवोल वाँहिद रिसालु। अथ मंज करितव तोह्य यूत
मुमकिन सपदि कँशीरि मंज आगाज प्यठु ल्यखन वाल्यन हुंद जिकिर
शुरू। ति जिन गव सारिवुय बौठ कँम्यसुंद ल्यूखमुत छु दँस्तियाब या
छुनु दँस्तियाब या तस पतु क्याह सपुद किथु पोक अदबुक सफर ब्रौठ
पकनावनुक सिलसिलु। तोह्य सूचिव यि सोरुय छु Kashmiri History या
History of Literature हिशन किताबन मंज ब्रौह दरुज। कथ छि सान्यन
अँजिक्यन रिसालन हुंज तिमन मंज मसवदुचि तु त्युहुंद खुलु पौद्य
लुकन तौन्य वाँतिथ response वुछनुचि प्रानि किताब छि बेशतर उर्दूहस

मंज। अज असि हिव्यन छुनु उर्दू तगानुय।

वारियाहन छि वृनिति यि कथ हॉरथ बासान जि कॉशीरि छि
यीचाह किताबु शाया करान तु सुती छि तिम पृछान यिम कति छि
यिवान हॉसिल करनु। मतलब व्योठ पॉट्य छनु लुकन खबर।

कथु ल्येछि मे वारयाह खबर सोरुय तोगमा लेखुन किनु नं।
लोतिस गोबिस दिज्योम मॉफी। मे छु सिरिफ अख शोख कॉशिरिस बे
खोफ वुछिनुक, कॉशिरिस अदबस इयक् बजर वुछिनुक बस...

जु खयाल छुसव 'वाख' रिसालु बापथ सोजान व्वमेद छम जि
वाख गोछ केंह photograph ति शाया करनुक संज करुन ति ज़न
मतलब painters, prose writers, dramatists, poets, artists related to
stage, muscians, singers गरुज कॉशिर्यन फनकारन हुंज पहचान बडिहे
नवि पुयि। तिमन मंज खॉली ल्यूखमुत हेकि स्यठा कम असर त्राविथ।
फोटुहस छु attraction strength ज्यादु आसान। कुनि शकिल प्यठ नज़र
त्राविथ छु बाजे तहकीक करनुक शोख व्वतुलान। मे बास्योव बु ह्यक्
त्वहि सुत्य कथु करिथ। मे करि योदवय लोत गोब बासिव कूछ ज़ानिथ
दिज्योम मॉफी।

—कुमार अशोक सराफ 'घायल'

110-ई—मुनीरका गाँव,

नँव दिल — 110067, Phone 9810636014

(घायल सॉब, ग्वडुन्यथय छुम अरज जि सही कॉशिरि हेजि हेछितव। तुहुंद
ल्यूखमुत छु द्वयि त्रैयि फिरि ठीक करुन प्यवान, युस वक्तु तु मेहनथ
द्रशवुय रँग्य बड कुडुर प्यवान छु।

तुहुंघा तजवीज छि रुत्य। व्वंगव य्वतान्य नु वाखस ज्यादु ज्यादु परन
वॉल्य तु मॉल्य ह्यनु वॉल्य आसन युथ खॉलिस अदबी मैग्जीन चलावुन छु
स्यठाह मुशिकल।—सं०)

असि क्याजि कौशुर बोलुन बरतबाह गछान?

सारिवुय ब्रोंह कॅर्यतव ग्वडु म्योन मुबारक स्वीकार, युथ मॉर्यमोंद तु स्वन्दर 'वाख' ह्वू मैग्जीन देवनागरी लिपी मंज कडनु खाँतर। यि सोरुय श्रेय छु त्वहि तु 'काव' सॉबस गछान। बॅड व्यछय गॅयि पूर।

ग्वडुनिक्य त्रे शुमारु महारा वॉत्य मे यिकुवटु तमि पतु वॉत्य लगातार। पोज़ गव यि जि वाखुक्य ग्वडुनिक्य जु शुमारु आयि बड मुशिकली सान परनु तिक्याजि तिहुंद फोट ओस त्यूत न्युक। मगर तमि पतु आव अथ कुन द्यान दिनु तु तमि पतुक्य शुमारु छि ठीक। बाग्यन हुंज बागनुय छि स्यठाह ख्वश करुवन्य, प्रथ कुनि बाँगिस छु पुर कॅशिश नाव थवनु आमुत, 'न्यतु त्वरुग', 'कथा यि कॅग्म न्वपॉर्य सथ', 'शिव छुय थलि—थलि ख ज्ञान', 'सॉरी समुहव यथ रजि लमुहव', बेतरि। प्रथ कांह बोग छु स्यठाह मानेसोव तु न्यरल्ह।

शान्त सॉब, त्वहि छि पानस खबर जि पलायनु पतु कम व्यखीफु आयि असि। तनि हुंद्य छ्वख छि ठीक सपदान मगर यिम छ्वख असि आत्माहस तु अन्तःकरनस लॅग्य, तिम गछन तु जांह ठीक। ज्यनु जाय तु माजि ज्यव यिम छि नम तु माज, यिम किथु कॅन्य गछून व्योन। नस्तालीखस मंज कौशुर लेखुन ओस अख तवकु ह्यकान पॅरिथ तु बाकी ऑस्य मुछय रोज्ञान। यि मैग्जीन महारा करि स्व व्यछय पूर तु बालु अपॉरिम्य ति ह्यकन पॅरिथ लीखित। व्वन्य गव पज़र छु यि जि कौशुर बोलुन, परुन तु लेखुन ज्ञन ह्योतुन सान्यन गरन मंज छ्वकनु। अँकिस बचस छै कम से कम त्रे चोर बाशायि हैछनुक बाश कुदरती आसान। येलि सु माजि हुंदि फरि तल छु नेरान तु सकूल ह्यवान गछुन सु छु तमि सातु जु ज़बानु हैछानय हैछान, अख हिन्दी तु ब्याख अंग्रीज्य गरि अगर मोल मॉज तस सुत्य कौशुर वार्तालाप करि, गयि त्रेयिम बाश तु हरगाह तस मॉलिस माजि सुत्य बेयि कुनि प्रदेशस मंज गछन पेयि तु गयि

ततिच ज़बान। वनुनुक मुदा छु जि सोन बचि हैकि काँशुर बाश गरि आराम सान हैछिथ। खबर यि कथ कोनु असि समुज यिवान। असि क्याजि कोशुर बोलुन बरतबाह गछान। अगर जु सरदार जी अमरीकाहस मंज समखन, तिम छि हुक् तु हुबु सान पंजॉद्व्य बोलान। बंगॉल्य बोलनवॉल्य तु तामिल बोलान वॉलन पनुन्य बाश बोलान। असी योत छि पनुन्य ज़बान बोलुन्य गाल तु मन्दछ गछान। खबर क्याजि।

मै छु याद 1970 किस दॅहिलिस ताम येलि कॅशीरि मंज मुशॉयिरु ऑस्य सपदान, बोज़न वॉल्य ऑस्य चॅसिथ यिवान, मुशॉयिरु ओस चमकान, ग्वनमाथ तु बोज़न वॉल्य ऑस्य व्वलसनस यिवान। पतु वोत सु वखुत, येलि शॉयिर तु कलमकार ऑस्य अॅकिस कमरस मंज पानय बोज़ान ति तु बोलान ति। यिथय कन छु मै खॅदिशु बासान, जि काँशुर लेखुन परन गोछ नु लेखन परन वाल्यन तामय सीमित रोजुन। यि टूंड छे स्यठाह नाकारु अगर नु अॅस्य अथ कुन द्यान दिमव। अख अहम मसलु छु रुस्मि खतुक तु निशान्यन हुद। स्यक् पाँद्व्य छुनु कांह ति खत स्यक् गछान। परन वोल तु लेखनवोल ति छु परेशान गछान। त्वहि छुवु स्यठाह जान पाँद्व्य निशानन हुंज निशान दिही कॅरमुच। यिम निशॉनी छे स्यठाह आसान तु कम्प्यटूर सॉव्य ति। मगर 'काँशुर समाचार' वाल्यव छु अख खत अपनोवमुत, बेयि मैग्जीन वाल्यव ब्याख। अमि सुत्य छि बडु परेशॉनी। यि मसलु गोछ हल गछुन।

'वाख' गव व्वन्य वारु कारु वॉरिशुन ह्योर। यि गछि नवुन तु फवलुन, अम्युक बागि बॅरचर गछि बडुन तु थदुन। यि छु तमि पोशि बागुक्य पाँद्व्य यथ ज़न कुसमु वार पोश छि शुबुरावान। यि पॅरिथ छेनु कांह व्यछ्य रोजान। अथ मंज छे साहित्यिचि सारेय सिनफु नज़रि गछान। गज़ल, नज़ुम, अफसानु, तहकीक, व्यंग बेतरि छि अथ बागिबोरुत बनावान।

त्वहि गछि दय ओरजुव तु दोरकोठ थवुन तिक्याजि यि छे

जानान दिलुच कदुर। बु छुस कुनि कुनि बालु अपारि अदीब दोस्तन
 सुत्य वोथमुत व्युठमुत। यि दूरयर गौछ नु हरगिज आसुन। अँस्य यपारि
 तुहय अपारि। यि ज़न छुनु सजान तिकयाजि अमि छु आंगुन अकुय।
 अँस्य छि कौशिर्य सौन्य ज़बान छे कौशिर। सोन कल्चर छु बिदून। यि
 छुनु मुमकिन जि नम तु माज़ क्याह हैकि अलग आँसिथ।... दिलुक
 सकून छु रोवमुत। तिम प्रॉन्य त्रिहय तु साथ ज़नतु छि आंगर पँछिनि
 निमुत्य। सु प्रोन माहोल ज़नतु छु खाब गोमुत।... खबर यथ सानि
 रेशवारि कँहुँज नज़र लँज। फिकरि छुनु तरान जि यि छा वक्तुक कसूर,
 यि छा सोन कसूर किनु सानि करमु लान्युक कसूर।... खौर, कथ छे यि
 जि कमय काल गव मे ओस पनुनिस टॉठिस यार (तुहुँछ पाँदय) प्रोफेसर
 शाद रमज़ानम अख मनज़ूम खत ल्यूखमुत। यि खत छु शाद सौबन
 कश्मीर युनिवर्सिटी हँदिस 'गुलाल' मैग्ज़ीनस मंज़ छाप कोरमुत। तिम
 छि अथ खतस मुतलक न्वम लफज़ बयान करान -- '(अथ खतस मंज़
 छु अनसॉरी सौबन) शारन मंज़ कौशिरि ज़बान्य हँदयन अहम शौयिरन तु
 कौशिरि अदबी तु सकाफती मीरासुक स्यठुहय नफ़ीस तरीक़ु ज़िकिर
 कोरमुत। अमि किन्य छे अथ मंज़ूम खतस अदबी अहमियत आमनस
 सुत्य सुत्य अख तवॉरीखी अहमियत ति। येमि सुत्य यिनु वॉलिस
 मुहकिकस कौशिर्यन अदीबन तु शौयिरन हँजि दौनिशवरी हुँद अंदाज़
 सपदिथ हैकि...!!... जिनाबो, योहय मंज़ूम खत छुस बु त्वहि ति
 सोज़ान... शोख ओसुम यि नज़ूम परुहा पनुन्यन पँडिथ बायन सुत्य
 जोमि कुनि मुशौयिरस मंज़। ख्वदा कँरिन सु दोह नसीब।

—शौकत अनसॉरी

नवाब नगर, बागवान पोरा, श्रीनगर।

स्यथ छु स्यप्तंबर सदौहिम आथुवार
 ईस्वी ज़ु सास शो आमुत शुमार

ओस वख शामुक करीबन साडु शे
 चिदय मुकामे लाल बाज़र लीछ मै...
 शोख ओसुम शोक साँबस करु सलाम
 बोज़हा यँच कौल्य तँम्य सुंद नौव कलाम
 वारु छुमु हज़ डाक्टर मजरुह रशीद
 लोल आमुत त्यूत छुम वुछहन बदीद...
 अख ज़माना ओस त्यूथ अदबी जनून
 आँस्य तेलि हालाथ वल्लाह पुरसकून
 रेडियो कश्मीरु की तिम बज़िम शार
 कोत सना गाव प्राणि तरजुक ह्यू खुमार
 पज़नु पौदयन राज बेगम आँस ग्यवान
 अँजिचि कुडरे वुछतु चीकल ज़न वदान
 दौछ गामुक वीरि सब्ज़ारुय व्वं रोव
 प्राणि तरजुक यारुबलें ख्योमुत छु गोव
 अज़ गोमुत सँरय पैदय छु सौनिस कल्चरस
 प्रोन कोशुर वुछतु ज़न लोगमुत दरस
 चोंग थोवुख तीलु रोस काँशिर ज़बान
 गाश सोर्योमुत अँमिस छनु कांह वुछान...
 बोनि शैहजारा डलुक मशहूर ओस
 तथ टूठल्य बानस बनोवुख आबु खोस
 शाद साँबा, कति व्वं तिम हालाथ रूदय
 हाल पनुनुय बाँव्य बाँवी काँत्य मूदय
 महीदीन अख्तर तु बेयि संतोष रोव
 बेयि अली लोनुन ज़मां ख्वश पोश रोव
 कति छु दीनानाथ नाँदिम बेयि चमन
 रेह तु मोतीलाल साकी, अथ चु सन

जून डबि हुंद कोत सु पुष्करभान गोव ?
 सोमनाथ साधू मे सुती याद प्योव...
 क्याह सना गोव हाय तिमन बायन बटन
 जांह नु खोचान आँस्य अँस्य वावन त्रटन
 नाद लायान छुस बु हताशस द्वहय
 बाल् अपारे तँमिस आशस द्वहय
 अनतु तस बिमलायि रैना हुंज खबर
 क्या छे बोलान ललछदा शाँयिर ज़बर
 शांत सॉबन कोर न जांह पॉगाम योर
 तनु तिमव मॅशरॉव्य यनु तिम तँर्य अपोर...
 छुम मे बासान गोम खत शायद तवील
 गम म बर, जॉरी छु अथ दरियायि मील
 बस अदीबन, बुनि न अदबुच कथ करय
 यूत लीखिथ बुनि छे बासान मॅट छूरुय...
 आँखरस प्यठ चोन मुखलिस हम कलम
 'शोकत अनसॉरी' चवान छुय जामि जम।

तुहंजु कोताँहियि

महारा, मे वुछ वाखुक्य कॅह इशू। पँज्य पॉदय छे यि असि
 काँशिर्यन हुँदि खाँतरु खुशी तु मुबारकच कथ जि अख जान तु थदि
 पायुक मैग्जीन छु नेरान। तुहुँघन परन वाल्यन हुंजि अथ रायि सुत्य छुस
 बु इतिफाक करान जि यि गोछ सँहल पॉदय जेमि मेलुन। खबर असि
 कर यियि माक्यर्यटिंग सेन्स तु चीज़ बनावनु विजि सोंचव तमि कि
 कुननुक तु नफा न्वक्सानुक ति। बु छुस जाँनिथ मैग्जीन छपनस आसन
 तुहुँदिस दफतरस मंज सॉरी ख्वश गछान, मगर तमि खाँतरु यि करुन

पजि ति करनु विजि आसन पोत हयवान। असि छे छावनदोसी जान तगान।

मगर मे छे एडिटरस निश ति केह बेयि व्वमेदु। तौरीफ छिवु त्वहि करान वाराह अमापोज तुहुँजन कोतोहियन कुन ज्वन न्युन ति छु जान परन वाल्यन हुंद फरुज। मैग्जीन छुनु वक्तस प्यठ नेरान। कांह इशू छु 60—ठन पेजन हुंद आसान कांह 90—तन हुंद कुनि मंज छि तिम सौरी कालम आसान यिम त्वहि पानय शरू कॅर्यमुत्य छिवु मगर कुनि मंज छिनु आसानुय। असि छे व्वमेद आसान सारिनुय मंज आसि कुनि लल वाखस प्यठुय बनावनु आमुच पेंटिंग, मगर कुनि कुनि मंज छेनु आसान। यिमन कुन तुहुंद तवजो फिरनु सुत्य बनि वाख ज़्यादु जान।
(अंगरीज्य प्यठु अनुवाद)

—संचित भट्ट

मिश्रीवाला, जम्मू।

(शुकरिया संचित जी, म्यान्यन कॅमियन हुंज कथ कॅरव। पजर गव यि जि त्वहि कोरव मे प्यठ एहसान। पनुनिंस बचावस मंज युस जवाब बु त्वहि दिमु, सु करि शायद त्वहि तिमव मुशिकलातव निशि ज़ान्याब यिम नागरी खतस मंज ग्वडन्युक खॉलिस साहित्यिक मैग्जीन कडनस मंज यिवान छि। अमि सुत्य गछि शायद सान्यन बुदि जीवियन बेयि बेयि मसलन कुन ति ज्वन। तु अमि खॉतर लेखु बु बेयिस (याने वाख—8 अक्तूबर 07-तस) मंज एडिटोरियल अँथ्य मसलस प्यठ, युस बहरहाल एडिटिंग हुंज व्यछुनय आसि, सिरिफ जवाबु खॉतर लेखनु आसि नु आमुत। सं०)

वाख तु वचुन
वाख तु वचुन

काँशुर पब्लिशर कति छु?

लेखनु परनुकिस आलमस मंज छि आम पाँट्य त्रै रोकुन या त्रै पँख्य कॉम करान। तिम गँयि किताब लेखन वोल् या लेखक यस निश खयाल जन्म लबान छु तु पतु कविता—कहानी—ड्रामा या बैयि कुनि तथ्य—संग्रह या तथ्य—शोद (रिसर्च) चि शक्लि मंज तयार गछान छु। यि छु किताबि शक्लि आसान तु अम्युक मकसद छु तेलि पूर गछान येलि यि परन वालिस ताम वाति। परन वोल् हैकि सु आँसिथ युस किताबि हुंद कुमथ दिथ स्व मोल्य हैयि तु परि या कुनि व्वजुम ह्यथ किताब परि — सु यारस दोस्तस निश आँस्यतन या कुनि लायबॅरी प्यटु। लेखन वोल् छु अकोय आसान, मगर यिम परन वाल्य मुमकिन बनावनस मंज छु सारिवुय ख्वतु अहम रोल पब्लिशर सुंद। याने सु युस किताब छॉपिथ स्व बाँगरावन तु परनवाल्य सुंदन द्रन कर्यन पानुवाँन्य जूडिथ हाँकल पूर करान छु। येली यि हाँकल पूर आसि तेली गछि बोजुन कुनि ज़बाँन्य हुंद लेखनु परनुक सिस्टम छु पूर तु सेहतस मंज। स्व ज़बान छे तरकी करान।

काँशिरि ज़बाँन्य छा पब्लिशर? यि सवाल छु बैमोकु तु गलथ बासान तिक्याजि स्व क्वस ज़बानुय गँयि यथ नु लेखक तु परनवाल्य आसन? अगर न काँशिरिस पब्लिशर छु तेलि क्याजि छि काँशिर्य लेखक लेखान तु तेलि किथु कँन्य छे किताबु परन वाल्यन ताम वातान?

दरअसल छि काँशिरिच दास्तान अँजीब। वारियाहन लूकन छे खबर मगर तमि ख्वतु ज़्यादु लूकन छनु किंही पताह। तिम छि रेडियो

टीवी अखबारस मुतलिक, तिमन
बैङ्ग्य बैङ्ग्य प्राइवेट क्यो सरकार्य
बरादरी यनामु तु सम्मान मेलनस
मुतलिक बोजान तु मनस मंज छुख
तिमन काँशिर्यन बरादरी लेखकन
हुंद यज्जथ बडान। बाजे छि तिम
मन अँदरी काँशिर्यन लेखकन
बाक्य जवानन हुंदन लेखकन
(हिंदी, उर्दू अंगरीज्य पंजाब्य मराठ्य
बंगाल्य बेतरि) लगि लोर बेहनावान
या तिमन सुत्य मुकाबल करान।

यि छु मँही जि काँशिर्यन
लेखकन सुत्य छुनु किताबन हुँदि
तेदादु मुताबिक या परन वाल्यन
हुँदि तेदादु मुताबिक मुकाबल करन
यिवान तु प्राइवेट क्यो सरकार्य
प्रचारमाद्यम छि सारिन्य कुनी नजरि
वुछान। मगर तमि सुत्य मा ह्यकव
हकीकथ खँटिथ थाँविथ।?

बेशक छि काँशिर्य लेखन
वाँल्य ति वारियाह तु यिमन परन
वाँल्य ति छि। मगर काँत्याहं?
तम्युक अँदाजु हैकि तेली करनु
यिथ येलि असि ननि जि आम
पाँदय काँचाह किताबु छु काँह
लेखक छापुनावान।

कथ वाँच बैयि छापनस
प्यठ, या छापनावन वाँलिस
पब्लिशरस प्यठ। हकीकथ छै यि
जि त्युथ काँह शख्सुय, काँह
प्रसुबोल, काँह किताबुफरोश, या
काँह बापाँरी छुनु त्युथ युस काँसि
लेखकस अथि किताब लेखनावि
या लेखक सुंज लीछमुच किताब
छापनावि तु पतु पानय स्व किताब
बाँगरावनुच या कुननुच काँम करि।
आम पाँदय छु लेखक पनुन्य किताब
छापनावान तु पतु पानय बाँगरावान,
अमापोज मुफतुय। व्वंगव काँह काँह
लेखक छु बापाँर्य या बाजाँर्य
दानाँयी ति थावान तु सु छु पानय
दवु दव करिथ केँह किताबु कुनिथ
ह्यकान। तस छु बाजे सरकार्य
अहल कारन सुत्य, बाजे अफसरन
सुत्य रसूख आसान तु तिम छिस
केँह कापी सरकारु तरफु माल्य
ह्यवनॉविथ मदद करान। बाजे छु
सु काँसि काँसि चंदु गरमाँविथ पनुनि
केँह किताबु माल्य ह्यवनावान तु
पनुन खचु वटान। मगर यिछ काँम
छिन साँरी करिथ ह्यकान। यिथु
कँन्य छि यिथ्य प्राइवेट लेखक

प्राइवेट पब्लिशर बॅनिथ पनुन पाँसु
वापस अनान। यिमव मंजय ति
छुनु कांह यहाँय काँम कॅरिथ
पब्लिशिंग हुंद कार करान। खॉर
म्वखसंर छे कथ यि जि ज़्यादु तर
लेखक छि पानय पनुन्यन किताबन
हुंद पब्लिशर ति, तिम किताबु
छापान तु बाँगरान छि पानय,
कून्यतन या न स्व गयि वखरु कथ।

यि छु कॉशिर्यन किताबन
हुंदि शाया (प्रकाशित) गछुनुक सूरति
हाल। यि मदि नज़र थाँविथ छु
सरकारन फॉसलु कौरमुत जि
लेखकन दिमव पनुनि किताबु पानय
छाप करनु खॉतरु कम कासु मदद
यथ 'सब्सिडी' वनान छि। जम्मू
कश्मीर कल्चरल अकैडेमी अलावु
छि कॅह सश्ट्री अदारु मसलन भारत
सरकारुक एजुकेशन डिपार्टमेंट, हिंदी
निदेशालय, उर्दू काँसल, सी आई
एल बेतरि ति लेखकन कॅछाह अथु
रोट करान।

मगर अमि सुत्य क्वसु सही
तरकी हैकि कॉशिरिस सपदिथ यि
छु सवाल अज़ ति त्युथुय युथ
अज़ ब्रॉह पंचाह शेठ वॅरी ओस।

तेलि वरिश ऑस्य रेडियो टी वी
वगॉरु जोशु किन्य काँशुर फॉलावनस
मंज ज़्यादु मदद करान तु परन
वाल्यान ति ओस पनुनि माजि ज़ेवि
मंज परन आकर्शक बासान। अज़
छि परन वाल्यन बाक्युय दर्जन वादु
वतु तु सहूलियत, अज़ क्वसु फरख
पेयि तिमन अगर नु तिम काँशुर
परन?

काँशुर परन वाल्यन हुंदि
तेदादुक अंदाज़ु लगावुन छुनु व्वन्य
मुशिकल। मासिवायि काँशिर्य
सकूल कालेज लॅडकु लॅडकियि
(मतलब यिम/यिम काँशुर अकि
सब्जकट पाँद्य परान छि/छे) पनुनि
मरज़ियि या हाजत या पसंदु
मुताबिक काँशिरि किताबु परन
वाल्यान हुंद तेदाद आसि सिरिफ
कॅचन हतन मंज। तु अगरय मानव
जि सकूल कालेजि परन वाल्यव
मंजु आसन कॅह तिथ्य ति रोज़ान
यिम पतु ति काँशिर किताब परनस
कुन रगबथ हावन, ति कॅरिथ ति
आसि न कुल परन वाल्यन हुंज
तेदाद कॅचव सासव ज़्यादु।

अथ हयकन खबर कृत्य

वजह आसिथ मगर अख बोड बाउ
वजह छु जि काँशुर पब्लिशर छुनु
कुनी। सु युस पेशिवरानु तरीकस
प्यठ किताबु शायी करिहे तु तिमन
बाज़र हाविहे। यि मानव जि
बुन्यकिस छि परन वॉल्य कमय
शोकीन मगर यि छु पज़र जि माल
बुछिथ ति छि खरीदार पाँदु गछान।
अलग अलग चीज़न मुतलक
किताबु येलि दुकानु शल्फन प्यठ
मजाविथ आसन, वाराहन तंबलि
दिल तु चंदु कडन पाँसु। बेयि छि
यि हकीकथ जि युसुय मोल्य ह्यथ
किताब परि सुय गव 'जेनविन'
परन बोल। नतु छि लेखक महोदय
चंदु पाँस खर्चाविथ या सन्मिडी
रैथिथ किताब छापान तु पतु स्व
मुफ्तुय बाँगरावान। रटन बोल छु
स्व किताब गरि ताकचम प्यठ
थवान, परान न कैह।

यथ मसलस सृत्य छु व्याख
मसलु ति। नागरी लिपी मंजु ति
छनु व्वन्य कम किताबु छपान।
तिमन ति छि वाराह मॉलदार। देशस
ति तु विदेशस मंजु ति छि काँशिर्य
काँशुर परन यछान। यि कैछाह

छपान छु तम्युक कैह हिंसु छु
इंटरन्यटस ति खसान तु यिथु कैन्य
छि नागरी काँशुर परन वॉल्य
वारियाह। अगरय बुछव तु काँशुर
परन वॉल्य छि तिम ज़्यादु यिम
कँशीरि न्यबर छि छँकरिथ, कँशीरि
छनु अमिच सूरथ ज़्यादु बेहतर कैह।

यि नज़रि तल थँविथ अगरय
कँशीरि न्यबर नागरी काँशिरिस मंजु
किताबु प्रकाशित करन बोल काँछाह
नेरिहे, कोताह जान गयोव। यीन
हन छे स्यकु जि तँमिस न्वकसान
गछि नु कैह। व्वंगव नोव कारुबार
शोरू करन वॉलिस छि मुशिकल
यिवानुय। प्रकाशन कारुबारस ति
हयकन यिथ। मगर प्रथ कारुबार
शोरू करन बोल छु ग्वडु अकि
कुस्मुच मारक्यट संवें करान। यि
सोन प्रकाशक ति करिहे ती। अँमिस
युस चीज़ सारिवुय खवतु ज़्यादु
प्रोत्साहन दियि सु गव वतनव्यलाँय
काँशिर्यन हुंज वतनदोरी, काँशिर्च
कामना, ललद्यद तु परमानंद बेयि
परनुच व्वछि, कुनि तरीकु कँशीरि
सृत्य जुडिथ रोज़नुच मनि कामन।
यि मनिकामन छे बुन्यक्यस सोन

जादाद तु वस्मथ। अमी किन्य छि
अँस्य द्यमाँगी तु मानसिक जुव ज्यतु
हॉसिल कॅरिथ ह्यकान। यहाँय छे
साँन्य प्रज़नुथ बचावनुच आँखरी
वथ।

अथ सिलसिलस मंज़ करेयि
केंचव संस्थायव तु केंचव नफ़रव
स्यठाह व्वठ छांठ। बमयि हुंघ श्री
म.क.रैना साँबुन्य कूशिश छे याद
करुन्य लायख। तिमव करेयि नागरी
काँशिरि किताबु कापरेटिव कॅशिशव
सुत्य प्रकाशित करनवानु खाँतरु
स्यठाह तगु दव। जोमिचि 'संप्रति'
संस्थायि ह्यचॉयि यि काँम मटि तु
लेखक साँबरोवख। कृन्ना मिटिंगु
गॅयि। अख कामन मकसद तु सु
पूरु करुनुच प्रक्रिया ति आयि शोरू
करन। ज़्यादुतर लेखक आँस्य राँजी

ति जि वारि वारि छपन तिहुंज़
किताबु तु अख रुत सिलसिलु गछि
शोरू। रैना साँब आयि साँरी
कारवाँयी सुत्य बाखबर थवनु। मगर,
..मगर... होसलु ह्योतुन वार वार
छ्यतु गछुन तु व्वन्य छे हालथ
स्वय य्वसु काँशिरिस कुस्मतस छे।
अथुवास कॅरिथ पब्लिशिंग हेच नु
शोरू गॅछिथ।

मगर व्वमेद छनु त्रावुन्य।
सिरिफ़ छु अमि सु पनुन लोल
तेज़ुरावुन युस असि माजि जेवि
खाँतरु छु, माजि कॅशीरि खाँतरु छु,
ललद्येदि तु कृष्ण जू राजदाननि
खाँतरु छु। किताबन हुंज़ ज़रूरथ
पेयि लगातार तु पब्लिशरस लगि
नु चारु ज़नुम ह्यनस।

काँशुर वनवुन छु सामवीद।
पनुनि वनवन-परंपरायि म कॅरिव नफरथ।
'काँशुर (शस्तरी) वनवुन' छु
छॅपिथ जोमि केंचन किताबु वाल्येन निश दँस्याब।

ग्यानु मारुग छुय हाक् वॉर

गुलाम रसूल बट छि सीनियर कॉशिर्य रिसर्च ऑलिम। ऑलिमस अदबस तु कल्चरल प्पठ यिहुंघ लेख छि बराबर सोन त वजू पानस कुन निवान। पेश छु यिहुंघ अख ज्यूठ लेख यथ मंज केंचन हॉरान कुन जायन तु चीजन मुतलिक सोन व्यचार तु सोंच ब्रोंह छुनु गोमुत। येमि लेखुकिस ग्वडनिकिस हिसस मंज ओस सिरिफ मजमूनुक पस मंजर (पृष्ठ बूमी) दिनु आमुत। यथ हिसस मंज छे केंचन अजॉयबातन हुंज म्खसर जान पेश।

कॅशीरि हुंघ केंह अजॉयिबात - 2

—गुलाम रसूल बट

शॉयरव तु ऑल्यमव छे यि गुल जमीन कश्मीर पनुन्यव पसंदीदु तु दिलकश खसूस्ययातव तु आत्मानंद नजारव तु मरग किन्य जर्नति नजीर करार दिचमुच। यिमव बेशुमार खासूसियातव तु दिलफिरेब तु मनहर खूबियव सुत्य सुत्य छि क्वदरतन यथ पोशि वारि तिथिय अजॉयबात ति अता कॅर्यमुत्य यिमन वुछित अख जी होश यिनसान हॉरतन छु प्यवान। यिमन अजायबातन हुंद ज़िकिर छु कॅशीरि हुंजन प्रान्यन तॉरीखन मंज मेलान। यिमन मंज छि केंह तिम अजॉयबात यिम प्रानि ज़मानु ऑस्य, मगर वुन्यकन छिनु नॅन्य, अमापोज अकसर अजॉयबात छि वुन्यकनस ति मूजूद मगर केंचन अजॉयबातन हुंद्य राज छि वुनि ति सरबस्त हालतस मंज। कॅशीरि नाग, पहाड तु गार बेतरि केंचन अजॉयबातन हुंद्य मोलूमात छि यिथु पॉदय।

कॅशीरि हुंद्यव प्रान्यव तवॉरीखव मंजु छि ग्वडनिव प्रॉन्य दस्तयाब 'राजतरंगी' यवसु कलहन पंडितन छे राज जय सिंगनिस अहदस 1150

CC-0. Bhushan Lal Kaul Jammu Collection. Digitized by eGangotri

यस मंज तौलीफ कॅरमुच। अथ
तौरीखस मंज छु फखरुसान कलहन
पंडित कॅशीरि हृंद्यन अजॉयबातन
हुंद जिकिर कौरमुत। यिमान मंज
पाप सूदन त्री संद्या, मोजजु नुमा
नाग, ख्वद बॅ ख्वद नार पॉदु सपदन
वाजुन्य जाय स्वयमहव तीर्थ तु
गंगोबेद, बेतरि।

कलहन पंडित छु अथ मुकद्दस
गंगोभेद तीर्थस मुतलक लेखान
जि अथ तीर्थस सुत्य छु अख
सु नाग ति येतथ शीन छुनु
प्यवान, यिमतिदादि जमानु सब्बु
ओस कॅशीरि हृंद्यन लुकन
यि तीर्थ मॅशित गोमुत।

गंगो भेद तीर्थ नागः कॅशीरि हंज जाय
येति नु शीनुय छु प्यवान :

कलहन पंडित छु अथ
मुकद्दस गंगोभेद तीर्थस मुतलक
लेखान जि अथ तीर्थस सुत्य छु
अख सु नाग ति येतथ शीन छुनु
प्यवान, यिमतिदादि जमानु सब्बु
ओस कॅशीरि हृंद्यन लुकन यि
तीर्थ मॅशित गोमुत। 1895 ई. यस
मंज येलि स्टायिन सॉबन
'राजतरंगनी' हुंद तरजमु अंगरीज
जबॉन्य मंज ह्योत करुन तु तॅम्य
कॅर अमि जायि हंज तलाश। अथ
जमानस मंज ओस न यि जाय
काँसि वॅनिस तल, न ओसुख अमि
जायि हुंद पय पताह। लेहजा प्येयि
स्टायिन सॉबस यि जाय वनि

कडनस मंज कॉफी दव दव तु
मेहनत करुन्य। ओखर शेन वॅर्ययन
हुंदि तहकीक पतु लॅब तॅम्य यि
जाय शुपयनकिस अँकिस जंगलस
मंज। स्टायिन सॉबनि बयानु
मुताँबिक छु यि मुकदस नाग तु
तीर्थ शुपयनस करीब अँकिस बालस
प्यठ मूजूद। अथ जायि छि
वुन्यकनस 'बदु ब्रॉर' वनान। स्टायिन
सॉब छु अथ नागस मुतलक मजीद
लेखान जि अथ नागस यथ कलहन
पंड्यतन 'गंगो भेद' नाव छु
ल्यूखमुत, येलि मे यि दॅर्ययाफत
कौर यि ओस गरमी हुंद मोसिम।
अमि विजि ओस अमि नागुक आब
गरुम। अमि सुत्य सपद्यव मे येमि
कथि हुंद अंदाजु जि पॅज्य पॉद्य
आसि सरदी हृंद्यन अयामन मंज

नागु किस गरुम आबस बाहु व्वथान,
येमि सबबु अथ नागस अँदय पँख्य
प्योमुत शीन आसि सुती व्यगुलान
तु जमा आसि नु सपदान। ओबुल
फज़लन ति छु आयीनि अकबँरी
जिल्द दौयमिकिस सफु नं. 362
हस प्यठ ल्यूखमुत जि कँशीरि मंज़
छे शकरूह जायि अँकिस बालस
तल अख नागु पोखुर येम्युक आब
वुज़वुन तु पकुवुन छु तु येतेथ
शीन प्यवॉनी छुनु।

स्वयंभव तीर्थ येतेथ ज़मीनि मंज़ नार
ओस नेरान :

कलहन पँडित छु राज
तरंगनी मंज़ अथ तीरथस मुतलक

वननु छु यिवान जि खास मोकन
प्यठ ओस यिमव फ़ाटव किन्य
नार नेरान। यिमन द्वहन आँस्य
स्यठाह यात्री ओर यिवान तु
मज़हबी रसूम अंजाम दिवान।
अथ जायि ओस नार यूत नेरान
जि हरगाह कांह चीज़ ओस
ज़मीनि प्यठ त्रावनु यिवान सु
ओस फोरन दौंजिथ प्यवान।

तरंग अख शलूक 34 पनुनिस
दीबाचस मंज़ लेखान 'जि कँशीरि
मंज़ छु स्वयंभव जायि ज़मीनि मंज़
नार नेरान, ओर छि यात्री यिवान
गछान तु मज़हबी रसूम अंजाम
दिवान।'

अथ जायि छि वुन्यकनस
'स्वयम' वनान। यि जाय छे
हमलुकिस शुमालस मंज़ परगनु मँची
पोरकिस निचिहोम किस जनूब
मगरिब तरफु ओड मील दूर
अतसुक बुडर (शख बुडर) प्यठ
डाय मील दूर शुमालस मंज़ वाका।
स्टायिन साँब छु मज़ीद लेखान जि
1892 ई. यस मंज़ येलि बु अथ
जायि वोतुस मे वुछ अति ज़मीनि
सौथुर दौदमुत तु अम्युक रंग व्वजुल।
बेयि आसु जायि जायि ज़मीनस
फ़ाटु गँमुत्तु। वननु छु यिवान जि
खास मोकन प्यठ ओस यिमव
फ़ाटव किन्य नार नेरान। यिमन द्वहन
आँस्य स्यठाह यात्री ओर यिवान
तु मज़हबी रसूम अंजाम दिवान।
अथ जायि ओस नार यूत नेरान
जि हरगाह कांह चीज़ ओस ज़मीनि
प्यठ त्रावनु यिवान सु ओस फोरन

दँजिथ प्यवान। स्टायिन सॉबनि
बयानु मुताबिक आयि अमि ज़मीनु
मंज नार नेरनुच यि हालथ आँखरीं
मरतब 1876 ई. मंज वुछनु।

औबुलफज़ल ति छु 'आयीम
अकबॅरी' जिल्द दोयमिकिस सफु
नं. 365 हस प्यठ अमि ज़मीनि
मंज नार नेरनुक ज़िकिर करान।
लारस सॉबन ति छु 'वेली आफ
कश्मीर' सफु नं. 42 हस प्यठ
अमि ख्वद ब ख्वद ज़मीन मंजु
नार नेरनस मुतलक ल्यूखमुत ज़ि
गुज़शतु सँदी हुँदिस इबतिदौयी हिसस
मंज आव ज़मीनि मंज नार नेरनुक
मुशाहदु ति करनु।

कोहि हरम्वखः

यि कोह छु सिरीनगर प्यठ
शुमालस कुन मुतसिल परगानु लार
तु ख्वयहोमि कॅरीबन 30 क़ूह दूर
वाका। अमि बालुक थज़र छु 16096
फुट। अमिक्य पाँछ थँदय थोंग्य
छि हमेशि शीनु सुत्य वॅलिथ
आसान। यिमन प्यठ छु वॅर्ययि
बदयन हुंद शीन मूजूद, येम्युक
रंग ज़रद, व्वजुल, सब्ज तु बुनॅफशि

छु बोज़नु यिवान। तवॉरीखस मंज
छु दरुज ज़ि अमि पहाडुक थोद
थोंग येति प्यठु बोज़नु छु यिवान
तथ जायि छि नु ज़हरेलु सरफ तु
मूज़ी कैम्य आसान।

नून मरुग बोनि बागः

नून मरुग नावुक यि बोनि
बाग छु परगॅन लार सायिरुलमवाज़ह
पाँयीन मुतसिल शहाबुदीन पोरस
मंज दॅर्ययावुकिस बँठिस प्यठ
वाका। हयदर मॅलिक चोडर्य छु
पनुनिस ताँरीखस मंज अथ बोनि
बागस मुतलिक लेखान ज़ि अगर
हतबॅदय लुख शामस द्वहस अथ
बागस मंज ठहरिथ आँश तु अशरथ
कॅरिथ शामस वापस गछान छि तु
अथ दोरान युस छ्वठ तिम अति
छि त्रावान सु छ्वठ छुनु सुबहंस
अति मूजूद आसान। ज़न छ रात
क्युत कैम्य ताम अति सफाँयी
कॅरमुच आसान।

कॅशीरि हुंदयन नागन तु चेशमु सारन
हुंदय अजॉयबातः

वासक नागः

यि नाग छु परगन दिवसरस

मुतसिल मोज़ा विलटेंग (क्वंड) बालुकिस दामनस तल वाकह। यि नाग छु हमेशि ज़मिस्तानस मंज़ ख्वशिक आसान। माहि चितर क्यन द्वहन मंज़ येलि ज़मीनदारन छु आबुक ज़रूरथ आसान तु अमि नागु मंज़ छु आब ज़ोरी सपदान। बहादरून किस आँखरस ताम छु

यि नाग छु हमेशि ज़मिस्तानस मंज़ ख्वशिक आसान। माहि चितर क्यन द्वहन मंज़ येलि ज़मीनदारन छु आबुक ज़रूरथ आसान तु अमि नागु मंज़ छु आब ज़ोरी सपदान। बहादरून किस आँखरस ताम छु अमि नागुक आब ज़ोरी रोज़ान।

अमि नागुक आब ज़ोरी रोज़ान। येलि दां फसल पपान छु अमि नागु मंज़ छु आब नेरुन बंद सपदान। यि अमल छे प्रथ वर्ययि यिथुय पॉद्य सपदान। तौरीखस मंज़ छु दरुज ज़ि यि नाग छु वंदस मंज़ अलाका दिंग मोज़ा गोयल कश्टवारस मंज़ ज़ोरी सपदान।

दिवसर कोह क्यन लुकन हुंद वनुन छु ज़ि येलि वासक नागु मंज़ आब ज़ोरी छु ह्यवान सपदान, ग्वडु छु अथ अलाकस तेज़ हवा करान तु अतिक्य लुख छि अमि विजि ज़ानान, ज़ि वासक नाग छु पकान।

सिंद ब़ोरी नागः

यि नाग छु मोज़ा ज़लनगाम पर्गनु प्रंग मुतसिल हुरनी मूजूद। यि नाग छु वंदस मंज़ हमेशि ख्वशिक आसान। अमि नागु निश छु प्रथ वर्ययि चिथरु किस रेतस मंज़ आब नेरान तु 15 जेठस ताम ज़ोरी रोज़ान। पतु छु अमि नागु निश आब प्रथ द्वह त्रैयि लटि ख़ाली सपदान तु पतु बेयि त्रैयि लटि जोशि सान नेरान तु होज़स बरान। यि हालथ छे हारुकिस आँखरस ताम थकु रोस्तुय द्वहस रातस काँयिम रोज़ान। हेंद्य छि अथ 'त्रैयि संद्या' वनान। प्रथ वरियि छि तिम जेठुकिस रेतस मंज़ ओर गँछिथ स्नान करान। यि नाग छु सौरिसुय वंदस मंज़ ख्वशिक आसान। हज़रत बाबा दावूद खाकीयन छु अथ नागस मुतलक यिथु पॉद्य फ्वरमोवमुतः

तुरफ ऐनी हस्त दर कश्मीर नामश सिंदबारा
आमद-ओ-रफते अजीब दारद ब रोज़ो शबोहाल

गंगु ब्रॉरी नागः

यि छु ब्वनहामा परगना
दीनसूहस मंज वाका। यि नाग छु
कॅरीबन सॉर्यसुय वॅर्ययस ख्वशिक
आसान। सिरिफ छु बहादून येमि
द्वहन हर म्वकट गंगाहुक मॉलु छु
असान अमि नागु मंजु आब जॉरी
सपदान। हैदय छि अथ 'गंगु जटन'
वनान। अमि द्वहन छि तिम ओर
गॅछिथ स्नान करान।

पवन सिंद नागः

यि छु अख अँजीब नाग
युस मुतसिल मोज़ह सडार परगनु
शाहआबादस मंज छु। वंदस मंज
छु यि हमेशि द्वन त्रेन रेतन ख्वशिक
आसान। फागन चिथर तु बॉसाखस
मंज छु अमि नागु निश आब जॉरी
सपदान। पतु छु श्रावनस ताम
अँकिस इनसान सुंदय पॉदय शाह
खालन तु वालन पॉदय अमि नागु
निश आब जॉरी रोज़ान। यिथु पॉदय
अख इनसान छु शाह खालान तु
तिथय पॉदय छु ग्वडु शह खालनु
विजि नागु मंजु आब नेरुन बंद

सपदान, पतु शाह त्रावनु विजि छु
आब जोशि सान अमि नागु निश
जॉरी सपदान। हैदय छि अथ नागस
मुतबरक मानान। अथ नागस
मुतलिक छु जिनाब बाबा दावूद
खाकीयन यिथु पॉदय फरमोमुतः
चश्म दीगर ब कमर हस्त नामश पवन सिंद
हस्त हरदम आमद व रफतश चु अनफसि रजाल

लॅदुर सिंद नाग :

यि नाग छु मोज़ाह हलवरिस
नज़दीक परगनु शाह आबादस मंज
मुतसिल गारि मंडा पहाडी प्यठ
वाका। जेठस मंज छु केंचन द्वहन
अमि निशि आब जॉरी सपदान।
अमि बागुक आब छु बालकि थज़रु
प्यठ ब्वन कुन वसान तु केंह गंट
पतु छु दुबारु बदसतूर जॉरी सपदान।
यिमन द्वहन छि बटु ओर गॅछिथ
स्नान करान। अथ बागस मुतलिक
छे यि कथ ति वनुनु यिवान जि
15 बयसाखु प्यठ 15 हारस ताम
छु अमि नागु निशि आब द्वहस
रातस कहि फिरि ज़ोरु सान वुज़ान।
तमि पतु छु बदास्तूर आब जॉरी
रोज़ान। वंदस मंज छु द्वन त्रेन र्यतन
ख्वशिक आसान।

क्रम्यशोर नागः

मलिक हैदर चोडर्य छु
पनुनिस तौरीखस मंज अमि नागुक
नाव क्रंब शोर ल्यूखमुत। यि नाग
छु मोजह क्रम्यशोर परगनु येछस
मंज मूजूद। वंदस मंज छु यि नाग
हमेशि ख्वशिक रोजान। सोंथ यिवुन
छि जमीनदार अथ नागस निश जमा
सपदान तु बतु रनान। बतु रैनिथ छु
लुकन मंज बोंगरावनु यिवान। पतु
छि लुख सॅमिथ ख्वदायि ताला
सुंदिस हरगाहस मंज जौरी सान
यिलतिजा करान, तोपतु छु अमि
नागु निशि आब जौरी सपदान।
अमि नागु निशि छु तोत ताम आब
नेरान, योतताम जिरातु खौतर
जोरूरथ छु आसान।

नारायन नाग :

यि नाग छु मोजह खाग
परगन बीरवस मंज मूजूद। यि नाग
छु केंचन गामन सौराब करान। अथ
नागस सुत्य छि बेयि ति केंह नाग
मूजूद। प्राणि जमानुक्यव मोर्यखव
छु अथ नागस मुतलक ल्यूखमुत
जि हरगाह कांह शखुस नरायन

नागस प्यठ छु गछान तु जौर सान
छु क्रकुनाद कूरान तु अथ नाग
मंजु किस आबस छे लहर व्वथान
अख अँकिस सुत्य छावनु यिवान।

खीर भवौनी नागः

यि नाग छु मोजह तुलमुलि
परगनु लारस मंज वाका। यि नाग
छु हैंदन हुंद अख मुतबरुक नाग।
अगरचि अमि नाग निशि छु कम
म्यकदारस मंज आब नेरान, मगर
कुनि कुनि छु अमि नागुक आब
रंग तबदील करान। मोरिख गुलाम
हुसनन वनुन छु जि 'कुनि छु अमि
नाग निश ग्वलौब्य रंग, कुनि सबुज
रंग तु कुनि सियाह रंगुक आब
नेरान। सियाह रंगुक आब छुनु जान
ख्याल यिवान करनु।' अति छे प्रथ
वैरियि जेठजूनु पछि आँठम द्रह
दिवय लगान। खीर भवौनी छु
बिजाँती रॉग्यन्या अस्थापन नाव।
रॉग्यन्या छे सरस्वती हुंद रूप। रॉग्या
महात्म मूजुब छे दीवी लंकायि प्यठ
यिथ अति बीठमुच। तुलमुल्युक
जिकिर छु राजतरंगनी मंज ति
आमुत।

ऐसे हिच सारिवुय खतु बँड खसूसियथ छे अम्युक डेजर ति तु
 बंदिश ति। डेजर किन्य छु लिखॉर्य मनु किस चंचल गुरिस यतु
 त्रावान तु बंदिश किन्य छु वुछान जि ऐसे हुक मरकजी खयाल तु
 मकसूद कथ यिनु रावि। यिम दशवय ग्वन छि यथ ऐसेहस मंज
 मजूद। पॅरिव तु पनुन्य राय लीखिव।

कथि मंज कथ

—रतन लाल जौहर

दपान क्वलि ख्वतु क्वल छि सर्द याने युस वख लचि टास
 कँडिथ गव सुय ओस जान तु यिनु वोले समय छनु पय क्या गुदरावि
 पानस शोठन। कुसताम वनान जि वख छु रँहदार गुर्य सुँद्य पौँद्य
 चलान। हता याऱु! गुरिस करव द्यठा म्यठा तु फिरहोन वापस पोज़ अथ
 क्या करख। खॉर! वख यि छु तु ति छु पानस छु। असि क्या करि?
 अँस्य न अँमिस मातहत। मातहत छिस अंग्रेज़, तिमनय खोचुनावि तु
 खोचुनावि। पथ गँयि अँस्य। जिनाबव! पनुनि मर्जी प्यठ। यि कलु दोद
 छु अंग्रेज़नुय या वनव पश्चिम वालिनुय जि हे! द्रह राथ छु चोवुह गाँटु।
 अथ मंज गँयि अरदाह गाँटु कॉम तु शो गाँटु आराम। अदु न छुख कुनि
 द्रह तु न राथ। न ख्यनस वख तु चनस। सु क्याह गव वॅरियस मंज छु
 र्यथ पछ फुरसथा कडुन्य तु फेरुन शहरु शहर तु दीशि दीशि हटरि
 हटरि केमरा खँडा ह्यथ। या गछुन तु खसुन बालु थ्वंग्यन तपालि नतु
 वसुन समंदर चँकिस प्यठ तु अँछ दौँद्य लदन हुँद्य पौँद्य दिन्य वॅन्य जि
 अति कम कम चॅरिंदु पॅरिंदु तु कुल्य कँद्य बेतरि छि। अदुबा त्वहि छवा

चँट्य अति यि छु तु ति छु। फेरान
आकाशस गरा जूनि प्यठ वसान तु
गरा मंगलस कुन पिलन ह्वान
करुन्य। अदबा ओर छुवा फहि
खसुन। रातु म्वगलन हुंघ पाँट्य
राँत्य रातस हुशारुय रोजुन तु अँछ
ह्योर कुन थवुनि जि कुस तारुख
फुट तु कुस छु फुटनस तयार। कुस
तारुख कपाँय छु गथ दिवान तु
कुस छु ल्वकुट या बोड। न्यँदरि
नाश छुनख कोरमुत दयन। हुथ
थफ, यथ थफ, छट्ट छठ करान
रोजान। हता यारु! असि छा यि
तुहुंज कलाकाँरी हटि वसान। अट्ट
बनाँयुव मीजायल तु शटल जहाजु।
निवान गँछिव चार्यव नोबल प्राइज।
करान गँछिव लेबारट्रियन मंज
मगजुमाँरी। अमि ख्वतु दँगिव
सायनंस।

अँस्य गँय नु पनुनि शङ्गल
निशि आंचि ति डलन वॉल्य। थम
डले हम न डले! तु सोन शङ्गल
छु ती याने चोवुह गाँटन मंज श्वंगुन
बशमूलि डाफ त्रावुन्य अरदाह गाँट
तु काँम त्रे गाँट दरबारदाँरी तु बँहसा
बँहसी ह्यथ शे गाँट। यिनय दूवजर

गछिहे यीत्य गाँट ति आँस्य ज्यादय।
अलबतु आ मरुन हय छु!
अख मेहरबाँनी गँयि यिहिंजि अमि
छट्टि छट्टि सुत्य। स्व यिजि यिम
टी.वी खंजि तु वी.सी.आर जचि
आयि बारसस। तमाम शुर्यन छि
यिम वुछान वुछान न्यँदरि सुत्य
डिकसु गछान तु बुजि नानि गँयि
दँलील वननु निशि आजाद। ब्रोंह
ओस नान्यन (स्वर्गु वॉसिन्यन) राँच
पहरन ताम प्यवान शुर्यन सुत्य
लेफि अंदर बिहिथ तिमन दँलील
वननि। शुर्य फट्टवांगन आँस्य न्यँदरि
अंदर ति आंकारा आंकारा करान
रोजान तु नान्यन आँस न्यँदरि दादि
चमठेमचन अँछन वारय फुट्ट गछान।
छेकरस आसुं तिमु राँटसु तु जिन
दँलील बोजनाँविथ तिमन तुर
फाटवान। तु अट्ट आँस्य ख्वखुत
म्वकुथ करिथ कलहीर लेफि तल

न्यँदरि नाश छुनख कोरमुत दयन।
हुथ थफ, यथ थफ, छट्ट छठ
करान रोजान। हता यारु! असि
छा यि तुहुंज कलाकाँरी हटि
वसान।

बरान। दपान ब्रौह कालि आँस्य
वनन तु खोवर्यन खोवर्यन या
लामन्यन तु नॉडिजन मंज जिनु
जॉच तु शीनु रॉचन रांटसु नमूदार
गछान। आसुहन मा! नतु कति
व्वथुहन तिमन नान्यन म्यादु मंजय
रांटसु तु जिनु दॅलील। पतु येलि
वारु वारु जंगल म्वकलॉव्य कुनिथ
दुनिथ तु खोफनाक शीनन ति पोत
ह्योत तिम जिन तु रांटसु गॅयि आदम
रख्त कॅरिथ इन्सानस सुत्य रलु।
व्वन्य गव तिम प्रॉन्य जिन आँस्य
चॉंग्य जिन। याम चोंग अथि लजाव
तु तिम आँस्य कलुहन नोमरिथ
ख्वर न्यठ प्यठ क्रख लायान —
होकुम मेरे आका! अँजिक्य जिन
छि र्वपयि जिन। र्वपय आसि
चंदस तु यिम ति दिन क्रख, हुकुम
मेरे आका। र्वपयि खश वुछन तु
पकन पतु पतु यि दॅप्यजि ति लॅट
गिलुवान। पथ रोज़ु रांटसु, तिमु ति
छे बुथ्यहन हावान रोज़ान। यस न
पछ बेहि तस पजि रोज़ानु अखबार
परुन। हफ़्तस मंज कॅह नय तु
तोति अकि द्वयि लटि वुछि किथु
कनि छु हशव उर्फ रांटसव दॅस्य

अख अख अदद न्वशिहन तीलु
लीटर छॅकिथ बमदति गंदख तुज
हवालय नार सपदान। टोप खुंजुन
गव वखरु सवाल तिक्कयजि टोप
खुंजुन या चॅप्य हैन्य मा हेकि
अखबॉरी खबर बॅनिथ!

सान्यव तिमव जदव
स्वर्गवास्यव छु वाराह काल ब्रौह
वॅनिथ थोवमुत जि तेलि मालि आसी
हु तु तेलि मालि आसी यि। अँड
पीच क्याह आसुर्य दानुच छु फरुख
गछान। अमा तिमन किथु पाँट्य
ओस तेली पता जि अजकल या
अज पतु क्या क्याह सपदि! आसि
ह्यख मा कांह दीसी पुर्जाह या
मशीनि पीचाह। सद बी साल वाँस
आँसिन आसारि कदीमा कयन
बिलचि तु गेंति अफसरन। द्यवु तिम
कुनि विजि अथ बारस मंज कांह
इन्किशाफ करन युथ जि अँस्य ति
ह्यकव पेशनगोयी कॅरिथ जि अज
पतु पांचाह, हथ या ज़ु हथ वॅरी
क्या सपदि! बु या मै हिव्य कावु
गाटुल्य ति छि नु बिहिथ कॅह।
अथ जिमनस मंज छे तहकीक
बराबर जॉरी। पांचाह शेठ वॅरी ताम

होक् बुति व्वन्य सेदि स्योद वुछिथ।
पछ नय यियिवु तु लीखिथ थंवि।
अज पतु वॅरी पांचाहमर याने करीब
सन 2050 ता 2060 हम ताम आसि
(वितस्तायि) ल्यतपोरि प्यठ छनुबल
वीर व्वन व्रह किलोमीटर ताम जेठि
ज्यूठ बाज़र तु बिचॉर व्यथ निकाँसी
हुंद नालु बॅनिथ अमि तॅल्य मंदुछ
मंदुछ तु चूरि इवचरा इवचरा दिवान।
शंकराचार बालस प्रथ तरफु तालि
प्यठ दामन ताम सब्जी मँडी तु
अति गंडु मबलगय त्रे हथ तु
पांचनमथ र्वपयि फी किलो थोक
बाव तु चोर हथ तु वुह र्वपयि
परंचू। ओलव चोर हथ तु वुह र्वपयि
फी किलो थोक तु चोर हथ सतथ
परचून। तु यि पाम तोति आम जि
गंडु तु ओलव खेय खेय छख
प्राचु आमचु।

कथ वछाय वखतुच मगर
यि गॅयि ह्वालमेट वरॉयी बेकुल
स्कूटर सवार सुंद पॉद्य नीरिथ तु
बिना हारन साइड निवान वॉच खबर
कोत। यि छे तिछुय हिश कथा जि
गछुन आसि द्रंगल तु वातव गंगबल।
खॉर! असुल शीर्शकस कुन यिमव।

यि वख याने समय छु असि तेलि
बासान चलवुन येलि यि जमानस
अंदर तबदील गछि। ति जन गव
दहि दहि वुहर्य, पंदाहि वुहर्य। यिति
चेनुहव नु मगर चमठेमचु अँछ,
बुथिचि गेनि तु तालि प्यदुक वालु
खाव हय जंगि तॅल्य त्रावि ति मगर
क्वदु तेंताल्यन प्यठ नपु नपु करवुन
शीन ह्यू मस छु मजबूर करान
चेननस जि वख छु वाराह नीरिथ
गोमुत। पतु येलि रिटॉर गछि अदु
छुस बॉर थफ ह्यू बेहान जि वॉस
हॉचुन छायि हॅलिस गछुन्य। अमि
पतु छिस गरि तमाम अपार्यम्यन
यपॉर्यम्यन शुर्यन हुंद स्कूल बेग
तु लंच डबु नॉल्य त्राविथ तिमन
स्कूल बसिताम निनुच इयूटी पुशरान
यथ नु कांह केजवल लीव तु न
सिक लीव चल्यस। गरु वाजनि
येलि ऊपर की आमदनी पूर पॉद्य
तु तनखाह मंजु ति न्यस्फा बंद छु
गछान स्व छे द्रह पतु द्रह खतरनाक
सूरत यखतियार करान। न्वशिहन
डिवटी नेरन विजि बबि तलुकिस
माचु क्रीलस फीडर ह्यथ अँमिस
हवालु करान। एम.एस.सी. बी.एड

कूर सेलि हंघ त्रे सूठ तु द्रॉग्य जु
सूठ सुचस त्रावनुक बांद बांद कॅरिथ
अँकिस इंगलिश मीडियम स्कूलस
मंज दूनन सतन हतन हंज माशटरी
करनि नेरान। हालांकि तस छि
र्यतस पलव पोशाक तु स्यंडल
साइयन ऑठ शथ लगान। गाडि
किरायि तु बाकी अखराजात गॅयि
अलग। स्व बिचॉर ति मजबूर, जान
पॉट्य नय स्कूल गछि बॅड मेडम
जी गछि नार तु तसुंद नार गछुन
गव अज कार गछुन। बॅड मेडम
जी याने प्रिंसिपल सॉब कॉचाह छि
पानु पॅरमुच, यि छु सु राज युस न
ता दोरि कयामथ फाश हेकि
सपदिथ। अलबतु छि सारिनुय यि
पताह जि स्व छि स्कूल मौलिक
सुंज आशोन्य तु स्कूलचि तथ
मनेजिंग कमीटी हंज जनरल सेकरट्री
यथ मंज तसुंद दुय, हिहुर तु ज़ाम
ति म्यंबर छि।

प्रायवेठ स्कूलन हंजि तरकी
हुंद छु यि आलम जि प्रथ कोचस
मंज छु अख अख इंगलिश मीडियम
स्कूल नॉविद वानन हंघ पॉट्य बोड
लगाँव्य लगाँव्य। जानुय गव।

ह्वपॉर्य हय कालिजव तु
यूनीवरसिटियव मंज नवजवान
डिगरी ह्यथ तिथु पॉट्य नेरान छि
यिथु पॉट्य सेनिमा हालव मंजु शो
म्वकुलिथ तमाशि बीन नेरान छि।
गछन कोत? प्रथ महकमस क्यो

एम.एस.सी. बी.एड कूर सेलि
हंघ त्रे सूठ तु द्रॉग्य जु सूठ
सुचस त्रावनुक बांद बांद कॅरिथ
अँकिस इंगलिश मीडियम
स्कूलस मंज दूनन सतन हतन
हंज माशटरी करनि नेरान।
हालांकि तस छि र्यतस पलव
पोशाक तु स्यंडल साइयन ऑठ
शथ लगान।

कारखानस छु त्यूत अवरलोड गोमुत
जि सुचन त्रावनस छनु बाथ।
यिमवुय मंजु छि कॅह ओरु योर
नाकाम गॅछिथ यकदम निवान
इंगलिश मीडियम स्कूल खूलिथ।

बु गोस बेयि मोजू निशि
छ्यनु। ग्वडु गछान फँजूल कथि
मंज कथा नीरिथ। बेहतर छु कथुय
खेन्य।

असि छे खुशी जिं वाखु किन्य गँयि केंह नँव्य लेखक तयार तु कँयन
 प्रान्यन लेखकन मंज नँव्य टेलेट बेदार। रोशन छु शॉयिर, मगर यिहुंद
 यि प्रोज़-पीस वुछिथ छु असि नोव गाश लबनु यिवान तु तिमन ति
 आसि पनुनिस यथ टेलेटस बेयिहन सगवनुक जोश पौंद गोमुत।
 'जौहर' सुंदि 'कथि मंज कथ' पतु यि ऐसे पँरिथ बासि त्वहि ज़रूर
 जि सही कॉशुर ऐसे छु यि न जि सु यथ यनामु तु इकरामु दिनु
 यिवान छु।

शीन

—रोशन लाल रोशन

शीन लफ़्ज बूजिथ छु कँशीरि हुंद होसुन चेतस प्यवान। यादु
 वोतरिस छु फ्युर लगान तु वंदुक सु हाल छु अँछन ब्रोंठु यिवान यथ
 मंज दारि प्यठ बिहिथ शीनु थोस्यन हुंद नज़ारु वुछुन लायख ओस
 आसान। ज़न तु कांह असमान प्यठ फंब कँतिथ पँथरिस त्रावान ओस।
 वंदस ओस पनुनुय मज़। वंदस तु जन्दस छु पानुवॉन्य वाठ। वंदु यिवुनुय
 छु जन्दुन ति, फ्युर लगान तु कांगर्यन ति बाव हुरान। वंदुक शीन छु
 कँशीरि बापथ खज़ानु। शीनु रोस वंदु गव जँच रोस हून। खॉर वनुन छुम
 क्याहताम तु वोतुस कोतताम।

सोन समाज छु यूताह फारवॉड गोमुत जि कॉशुर बोलन वॉलिस
 छु निचि नज़रि वुछनु यिवान तु कॉशिरिस पोछर दिनु बजायि छु यि
 मँशरावनस प्यठ ज़ोर दिनु यिवान। अपारि यपारि छे हिशी वदल गॉमुच।
 अपारि छे तोति अक्सँरियत कोशुर बोलान येलि ज़न अँस्य यपॉरिम

अलु पलु हवरद हिसु काँशुर खतम
करनस कुन लँग्यमुत्य छि। अपारि
छु सिरीनंगर किस मलु बाग
अलाकस मंजु अख इंगलिश
मीडियम सकूल येति काँशिर्य
पाँट्य कथु करनस प्यठ बचस या
जुरमानु सपदान छु नतु सकूल मंजु
कडनु यिवान छु। यपारि छे फाँशनुस
फुठ गछान तु काँशिर्य पाँट्य कथु
करन वाल्य पथ खोरि समजन
यिवान।

नफरत... नफरत... काँचाह
नफरत? हे ज़बाँन्य क्या कोसूर
छु? लल देदि युस ग्यान बोवमुत
छु सु छु ना काँशिर्य पाँट्य? नुंठ
रेश सुंद कलामु छु ना काँशिरिस
मंजु? काँशुर हय असि माजि ज्यव
छे। नफरत कथ प्यठ? दपान अगर
कुनि कोमुक वोजूद खतुम आसि
करन तेलि गछि तथ कोमस माजि
ज्यव मँशरावनु यिन्य। पानय सूंचतव
अँस्य कोर कुन छि लमान? सोन
पगाह क्युथ आसि?

लफुज 'शीन' छु काँशिर्यन
चेतसय मगर 'शीन' छु अजकल
कोर्यन नाव थावनु यिवान। यिनु

जि काँशुर नाव छु। न साँ स्व छे
नु कथ। काँशिरिस हय असि
वोजूदय ह्योत खतम करन। शीन
छु माडॉरन ज़मानुक फरहँग्य नाव।
शीन छे म्याँन्य जुर।

शीन नाव बूज़िथुय गोस बु
स्यठाह ख्वश जि सानि निचि आव
कोशुर नाव थवनु। अमा पोज़ येलि
म्याँन्यन ग्वनाहगार कनन गव जि
यि छु माडॉरन ज़मानुक फरहँग्य
नाव कमि ताम नावलि मंजु द्रामुत
तु टेलिविजनु प्यठ बूजमुत, कोशुर
छुनु, खबर पछ कँरिवा मै गोंडुन
नार मगर चख चाँपम यि जोनुम
जि बु कडस कोशुर 'शीन' माने मै
क्या? कति तिम काँशिर्य नाव
शूबिदार तु जेवि खसुन्य लायख
यथ मंजु लोल तु माय आँस तु
कति यिम नँव्य नाव न वनुनुय
तगान तु न मन पचुय। पनुन पनुन

'शीन' छु सानि कोरि नाव यथ
प्यठ यीच दँलील वनुन्य पेयि।
यि कोरिहन छे अज़ त्रि वॉरिश।
यि छे पॉरिम वरतावनस सुत्य
सुत्य कोशुर ति साफ बोलान।

सूचतव पानय जि रँतन दीप
जॉलिथ थवुन गयाव गटि मंज
गाश छारनुच अलामथ येलि
ज़न मोम बँत्य जॉलिथुय छयतु
करुन्य गटु छारुन्य मानि छु
थावान।

दोर। अथ क्या करव? अज़ कलक्य
यिम नाव मसलन सोनू, मोनू, रोज़ी,
टिंकू, ब्यूटी बेतरि। यिम कुनि हदस
ताम हटि वसुन्य लायक ऑस्य,
अमापोज़ व्वन्य सपद्य अँस्य
ज़्यादय मॉडॉरन तु फरहँग्य नाव
आयि बारसस। फॉशिन छि असि
ब्रुंहय पानुनॉव्यमुत्य तु रीचन रेवाजन
ति हयचुन यिहय वदल गछुन्य।

‘शीन’ छु सानि कोरि नाव
यथ प्यठ यीच दॅलील वनुन्य पेयि।
यि कोरिहन छे अज़ त्रि वॅरिश। यि
छे पॉरिम वरतावनस सुत्य सुत्य
कोशुर ति साफ बोलान। अथ छुनु
कांह शख जि अँजिक्य मॉल्य माज्य
छि शुर्यन माडॉरुन बनावुन्य यछान
तवय छि कॉशरिस नफरत कॅरिथ
शुर्यन पॉरिम ज़बानुय हैछनावान।
मगर अम्युक मतलब गव नु हरगिज़

जि अँस्य छुनव कँन्य आलविथ।
असि पज़ि यिमन पतु रूज़िथ
पॉरमिस सुत्य सुत्य कोशुर
वरतावनस प्यठ ति ज़ोर द्युन।
अमिच छे वक्तुच ज़ोरुथ तु छु
मुमकिन सॉनिस सकाफतस वाति
ददारु। ग्वडु छु तथ वारयाहस हदस
ताम फॉशनन तु नॅव्यव रेवाजव
सुत्य ददारु वोतुमतुय। सानि
सबितायि छु वोजूद रावनुक ति
खतरु य्वसु तशवीशस लायख कथ
छि।

सानि रीचु तु रवाज ऑस्य
नु यिथय। तिमन पँत्य किन्य ओस
कांह नतु कांह फलसफु ज़ोरु
आसान। यिमन मुतलक बॅहलिपायि
लिखार्यव तफसील सान बावथ
छि कॅरमुच। येलि ज़न अज़ कल
अँस्य हाव बावुक्य रेवाज पानुनावान
छि, येमि सुत्य सॉनिस कल्यरस
ददारु वोत तु सॉन्य सबिता हयँचुन
खत्म गछुन्य।

मिसाले नीतव वोहरवोद।
अमि द्वहु ऑस श्राना द्याना कॅरिथ
श्रदायि सान पूज़ा करनु यिवान तु
ताहरि प्रेप्युन हॉविथ हकन हमसायन

बॉगरनु यिवान। रंतुन दीप जॉलिथ
 ऑस्य दयस गटि मंजु गाश मंगान।
 अथ बरअकुस छि अज कल केकस
 प्यठ मोम बॅत्य जॉलिथुय छ्यतु
 करनु यिवान तु केक चटनु यिवान
 तु अँथ्य सुत्य डिस्को कॅरिथ फरहँग्य
 जबॉन्य हुंद हैपी बॅरथडे वनुन
 आसान। यि छु फरहँग्य रसुम
 येम्युक असि नकुल कोर। हॉरॉनी
 छि जि युस नु अमि तॅरीक मनावि
 तस छु निचि नजरि यिवान वुछनु।
 सूंचतव पानय जि रंतन दीप जॉलिथ
 थवुन गयाव गटि मंजु गाश छारनुच
 अलामथ येलिं ज़न मोम बॅत्य
 जॉलिथुय छ्यतु करुन्य गटु छारुन्य
 मानि छु थावान।

शीन म्याँन्य जुर छे बडु
 तेजु कूर। पॉरिम ज़बर बोलान मंगर
 सुतिय छे कोशुर ति साफ बोलान।
 हालचिय कथ छे जि तमि अँन्य मे
 सेथ यि वॅनिथ जि 'यह तलम
 (कलम) मेला है।' येलि बु
 क्याहताम लेखान ओसुस तु न्यून
 मे कलम अथु मंजु। शुर्य सेथा।
 रँच्य खंड्य वॅछ मे कुन। 'आप
 त्या (क्या) तर्गे हो?' मे वोनुस न

किंही। यि आयि मे नखु तु वोनुन
 'डेडी नु गोखा मे नालाज?' तु
 अँथ्य सुत्य न्यून माह कॅरिथ, यि
 ज़न गव सलाह लोगुन। मे द्युत
 अँमिस बदल कलम तु पनुन कलम
 ह्योतमस वापस। यि वॅछ बॅडिथ
 तु बूलिथ 'चूलतटा मूलतटा (नूरकटा
 मूरकटा) नु छुख शेतान।' मे हुनेयि
 ब्वकु यिछ साफ कथ बूजिथ। अगुन
 ति आम तु ख्वश ति गोस।

नु छुस नु फुट्यमुत्यन
 फवत्यन वातान जि म्याँन्य कूशिश
 छि कामयाब। वनुनुक मतलब छु
 योदवय अँमिस मोल मॉज पॉरिम
 पॉट्य कथ करान छि मिसाले 'हैंडी
 धोलो', 'सूसू करो', 'पोटी करो',
 'नोजी साफ करो', बेतरि। मगर
 अँस्य बाँच ज़ु छि अँमिस सिरिफ
 कॉशिर्य पॉठी कथ करान तु म्यानि
 बीमु छिस मे थी क्या, मँज्य मँज्य
 कोशरुय वरतावान। अमि सुत्य छे
 यि पॉरिमिस सुत्य सुत्य कोशुर ति
 साफ बोलान।

वाराह कथ छे मुननु आमुच।
 वारयाहन तकरीबन तु कांप्रनसन
 मंजु छु कोशुर लेखनस परनस प्यठ

वारयाह ज़ोर दिनु आमुत तु ब्रौह
कुन ति मा यियि ज़ोर दिनु।

हरगाह अँस्य पनुन्यन शुर्यन
अथ कथि प्यठ पतु रूजिथ ज़ोर
दिमव जि नवि पुयि गोछ पॉरिमिस
सुत्य सुत्य कोशुर ति वरतावनु युनु
स्यठाह जान ओस। यैमिक्य दूररस
नँतीजि नेरहन। नतु छे मे बासान
जि अँस्य मा छि शायद तकरीरन
दोरान या तहरीरन दोरान काँशिर
जबानं तु कल्चर रँछरावनु बापथ
बजि बजि कथु पानय मँशरावान
या यि मा गँयि नतु यिछ हिश
कथा जि पानस पर पर तु बेयिस
तबाबथ।

यिछ कथ गँछ नु कागज
वरकन प्यठुय रोज़नि। यिमन कथन
छे अमलावनुच ज़ोरूरथ। मे छे
व्वमेद जि सॉन्य बँहलिपायि बुजर्ग,
लिखाँर्य तु मुकरिर करन काँशुर
माजि ज़ेवि रँछरावनुच कूशिश य्वस
कूशिश पनुनिय गरि प्यठु शोरू
हैकि सपदिथ नतु छु मे बासान जि
सॉन्य प्रज़नथ मा गछि लछि।

अँस्य छि वनान 'जयसा देस
वयसा बेस' यि वनुन गव नु

काँशरुत यियि खतम करन? बाक्य
कोमन कुन वुछिथ पज़ि असि याद
थोवुन जि माजि ज़ेवि वरतावनु
सुत्य यियि न सानि पुयि माडॉरुन
जमानस मंज कांह दिकत पेश
बँलिकि बड्यख मान तु यिहय
सॉन्य नँव पुय करि न असि पगाह
ज़ांह माफ तु असी मानि कोसूरवार।
तिक्याजि माजि ज़्यवुय छे प्रज़नथ
रँछरावनुच अख वथ। पथ गव माजि
ज़ेवि वरतावनस मंज छि बकोलि
सान्यन शुर्यन दिकथ पेश यिवान।
स्व छे न कथ। हरगिज नु तिक्याजि
ल्वकुट शुर छु कांह ति कथ जलुद
हैछान। कुनि जायि कांह बूजमुच
कथ छु च्यतस थावान तु पॉन्य
पानय वरतावान। नतु कति हैछनॉव
मे शीन 'शेतान' लफ़्ज। तमि छु
बूजमुत तु वरतोवुन मोकस प्यठ।
तोह्य गँछिव हॉरान जि तमि वोन
ऊतरु नानि — 'मे वन बलायिं
लगय, अदु चमय द्वाद'। लेहाज़ा
यि वनुन जि शुर्यन छु माहोल
मजबूर करान कोशुर न बोलनस।
यि छु गलथ। तथ छे 'शीन'
मिसाल।

ज्यतु त्वरुग

गज़ल-1

मोती लाल कौल 'नाज़'

कमि तानुच कथ कर येति यारो, येति ज़न छम तानस तानस दग
 बूतलि सौरुय दगि ज़न चोटमुत, बंदु बंदु छय अस्मानस दग
 कपटन गॅय येति त्वकुट्यन तामथ, द्रुतु हौडरन असि वॅडरन कर
 रतु छेपि येलि नाहकुक्य पाहकुक्य लॅग्य, वॅछ अँदरी पतु शुमशानस दग
 तपु रेश्य तामथ, अडि ज़पु वॅथ्य वॅथ्य, ज़पु मालन ज़न फॅल्य छारान
 छवपि हुंज सुमरन, ग्वफु गारन हुंज, व्यतुरान व्यखुचुय पानस दग
 क्याह गव किथु गव सॉनिस बागस, लल त्रागस ताम सौर्यव पोन्थ
 बुथ्य फिर्य पोशन गौंद येलि येलि कोर, तैलि तैलि वॅछ गुलदानस दग
 दुरु लॅजमुच सथ बरकरि लॅजमुच, अरखर लोग रीशिम्य पगहस
 प्रिछु गौरा गछिहे, गछि किथु कन, छा येति कुनि पुरसानस दग?
 पछि हुंद्य पॅद्य त्वगॅलन गॅय लॉरिथ, हॉरिथ गव नज़रन हुंद वोन
 स्वखु सौथ्य दोखु मलरव नी डुव्य डुव्य, छायि हॅलिस ननिवानस दग
 सोम्बरिथ सौरुय छॅकरनु आमुत, सोम्बरुन सौरुय सख दुशवार
 छवकुवुन्य शाह ह्यथ डकुरेन कुस खसि, ख्वरु प्यठु आहिस्तानस दग
 प्रथ अंदु ज़न लॅजमुच लोलस लथ, सथ अस्मान 'नाज़स' प्येठ्य पेमुत्य
 गथ कथ करि ज्यथ ज़न रावान छस, न छि शमहस नय परवानस दग।

गजल-2

— 'नाज़'

नज़रु नोमरिथ थज़र प्रावन वॉल्य
आफताबस ति आजमावन वॉल्य

थवतु अबसिथ जॉव्यज़ार जिसमुक्य
देरपाँयी नसाँ छि हावन वॉल्य

सडकि मंज़ बाग पलन हंज़ कथ
सडकि पकवुन्य ति छिय नु बावन वॉल्य

कुस ति कूनाह रटव डुलॉम्य कथन
कथ नु नालस छि चाख द्यावन वॉल्य

आशि सोदरव बुबर ह्योर खॉर्य
बुबरु छरिरव ति तोशनावन वॉल्य

लूर डॅखरिथ ति मँज़िलन वातव
साफ वथ थावन अगर, हावन वॉल्य

तोसु वॅल्यतिस, अँथरि अथु पलज़ान
ज़ांह ति मानन तु तोसु छावन वॉल्य

हगरु फुट्य अगर मगर दॅस्ययाब
होजतु बाज़र स्यठाह सजावन वॉल्य।

असुवुनि होंजि

—बालकृष्ण 'सन्यासी'

तुलकुलि प्यठु सुबुहय चॅट कावन
तुल खयथा तोंति मंजाय त्राँवुन
असुवुनि होंजि छि यि वॅसुवुनि कोलि फॅट
नाल् कोडुम दोल गिरदाबन
खसुवुनि नावि द्युतुन अथु खँच बोठ
कावुशुप्यव रॅट पानस सुत्य
लाय फॅटस बरभदिन्यन स्येकि मंज
नेरि यि अति व्वन्य गटुराँचन

असुवुनि होंजि छि यि पशपान नूराह
आँविज जाँविज तुलमूरा
बुलचुक गव नु यि कावस वावस
जाँनिथा माँनिथा छोनुखा कुल
नूर छु त्रावान गाह तरफातन
तुल येलि ख्येयि हॅस कुल कति रूद
चंजि चंजि गछि, गछि व्वडिचॅड कूराह
लतु म्वंजि करनस अडरातन
व्वंटु छुस अँम्यसुंद तवुकिन्य शूकुम
क्वलि बुज्य गछिहेनु फोलिहे लॅन्ड
खँडफुठ ल्यँज मा दानस खारन
सूरु ल्यँजाह थवनस बरतल

असुवुनि होंजि छि यि माह मीट्य करनस
कँड्य तिम अचनस शुर्य पानस

लोल चुहा दिन कथ दिन क्याह दिन
अडखयव गाँमच तुल मूरा

असुवुनि होंजि अथ लंजि चंजि लायन
गटुजोल अनि छिपि वावस यूरय
सुबहुच प्रवु वुछथुय ब्रेड्य कडनस
बर थवनस दिथ गछि कोत नूर
वात्रु व्वं यितु चुय कावा लॉगिथ
तोंति बॅरिथ क्वलि मंजु त्रावुन
मेछर छुसनु तु द्यठरावोन मा
नूरय तेलि गछि नारुय नार
आँदी क्वलि मंजु खँच बेयि त्रावुन
गिन्दुनाव्यस गुथ ठठिनुय तल।

बुंज

—कुमार अशोक सराफ 'घायल'

बुंज छु बुंज
अथ छनु पोरान कांह ति कुंज
बुंज येलि ति तत्यव
तेलि मत्यव च्चवापाँर्य
बुंज येलि ति टोदयोव
तेलि मेदयोव ज़न तु माछ
ब्रिंज्युक दमाह
शाहरन समाह
ब्रिंज्युक तचर

अरुखलि टेछर
 ब्रिंज्युय मोथ तु ब्रुंजुय जनुम
 ब्रुंजुय क्रेया तु ब्रुंजुय करुम
 ब्रुंज येम्य प्रजुनोव
 तैम्य प्रोव दय
 ब्रुंज यस टोदयोव
 तस कति व्यछय?

ग्वडन्युक कुस अख कति रोज़ान

—‘घायल’

असि नख
 व्वसि आस
 नाहकय येलि राथ
 खलकव वोनुहम यिति गव, ब्याख
 ग्वडन्युक कुस अख कति रोज़ान
 कॅम्य अँक्य वुछमुत
 ग्वडन्युक अख
 कदमन मीदय तैमिस दिमहा योद
 पय वनिहम ग्वडनिक्य सुंद पोज़
 हे—यिनु साँ कांह खँटिथ अँसिवु कुनि
 अक्लि छोटुय छुस ‘घायल’ छुस
 हाजथ मंद छुस
 जल—जल वँन्यतोम
 ग्वडन्युक कतिनस
 कर समख्यम।

गजल-1

-मोती लाल 'मसरूफ'

हवस याँगी मचर छिवरोव पोशव
 सुबुह फवल्वुन सहर तंबलोव पोशव
 नजाकत पोशु टूर्यन काँफ बॅर्य बॅर्य
 शबाबा फवल्वुनुय व्वशलोव पोशव
 वुजिन्य लॅज नागरादन बोश सोंतस
 युथुय जलवा पनुन अख होव पोशव
 दँजिथ पेय जामु सबरुक्य शामु ब्रोंटुय
 हवस बूजुम युथुय दफनोव पोशव
 वतन प्यठ राज थॅव्यहम हॉर्यसातव
 कमन नाज़न जिगर पुचनोव पोशव
 कथा कॅर कॅम्य वनुम 'मसरूफ' चॉनी
 अमारन हय गिंदुन वदुनोव पोशव।

गजल-2

— 'मसरूफ'

बॅरिम वछ च्यतस याद पाँविम गहे
 रँछिम शोक व्वंद वुशनाँविम गहे
 कथन लोब नु माने हरफ आरुहँत्य
 वुठन प्यठ, फॅलिथ शार राँविम गहे

हवस मोन छिन्देव वतन प्यठ मु थाव
अथन कयथ रँटिथ नाज त्रॉविम गहे

असुन दूरय कोर प्यालु बँर्य बँर्य थँविन
विसुन ह्योत गुलव जाम चाँविम गहे

गिंदुन ह्योत खयालव अमारन रँछिथ
थँविम ग्रँज अन्दर तय सजाँविम गहे

बहारुक्य मँदुर्य नगमु 'मसरूफु' फँल्य
थनु पेय युथुय राज बॉविम गहे



वाख — लेखकन रियायथ

कॉशिरेन (हिंदी, उर्दू, अंगरीज़, कॉशुर) लेखकन हुंदि खॉतर छे **वाख** तरफु खास रियायथ दिनु यिवान। अँस्य ह्यकव तुहुंजन किताबन हुंघ इश्तहार स्यठाह कम रेटन प्यठ छाप कँरिथ। 4"x4" इश्तहार खॉतर 200 रु., ओड सफु — 500 रु., पूर सफु — 1000 रु.। पनुन इश्तहार सूज़िव अंगरीज़, हिंदी या कॉशिश्य पॉदय तु यि वँनिव जि मूल पॉठी किनु तर्जमु कँरिथ छिवु यछान द्युन। सुती गछि खरुच ति ड्राफ्ट बनॉविथ AIKS नावस प्यठ सोजुन। पत: AIKS, D-90, Sarojini Nagar, New-Delhi-23.

परुन स्वलब पालुन दवल्लब
परुन स्वलब पालुन दवल्लब

पँत्यमि रयतु वुछुम अखबारस अँकिस प्यठ 'द्यूलिप बागुक' फोटू। यि गव
दिलस सँनिथ तु लेछम केंह लॉनु। यिम लॉनु छुस त्वहि सोजान। वुछतव तु
पँर्यतव। अगर ज़बर आसन तैलि दीतोख वाखुकिस कुनि अंकस मंज जाय।

द्यूलिप बाग

—पृथ्वीनाथ मधुप

होरि प्यठु वेंछमुन्न
अख स्वंजलि छवखाह
हुरावान कृताह गाश—
नज़ुरन
शेहुलावान—
तापु—तँत्यन बदुनन।

प्रथ कांह अँछ—
कुचाह थामि गछान
टार्यन यखदम—
टिटुराय मशान
सँन्य सँदुर
बावुच हुँदय बावान
मस चँश्मव—
वुछ कमि आयि वुछान
प्राय ख्यथ वावुच
क्याह नाफु छकान!

मॉर्यमँन्द्य असुनस
वुछ कम—कम रंग
सीनु छि यखदम रंगनु यिवान
रंगवनु गोछ युन—
अँथ्य रंगसुय मंज
अख—अख ज़रु—
छवकुलद बुतराँच हुँद!

आगु व्योदुय
आगु व्योदुय

खद ज़न अरविंद गिगू वारयाह कालु प्यटु लेखान आसुहन, यिम गॅयि
जोमि किस आकाशस प्यट कौशिर्यन नज़्मन हुंदि तर्जमुकार रँग्य
जौहिर। मजबूर या बिमला जी हुंघ अंगरीज़्य तर्जमु छि दरअसल
शौयिर अरविंद सुंदुय जहार छटान। येत्यन छे यिहुंज अख मूल
अंगरीज़्य नज़्म कौशिरौविथ सान्यन परन वाल्यन हुंदि बापथ पेश।

अब्यन्यर

—अरविंद गिगू

छवकुरौविथ त्रोवनस
अमि चानि स्वनुं सुंजि
पां चादरि,
श्रौन्य गोस
यि श्रान छु सत—आनंद, दिलुक करार
मलर्यव मलर्यव वसान छे आबु फरदय
म्यौन्य वुठ छिस म्यूठ करान
म्यानि दिलुच दुबराय छे
रसु रसु
बनान
स्वर—संगम
स्वरुख तु अँदरि छे चेश्मु
तु
मे छि दौदय बलान

नील नाग जूर्य छय बुथिस
बाग छि अनान बरजस्तु
बुशिन्य बुशिन्य श्रेहल वुठ
बागस पोश फवलान

सर सब्ज छु / म्योन दुनिया

पनुन अथु छुस / पिशिलिस सोथरिस प्यठ फिरवान
ग्राय छे लगान / गुलि अफताबन द्वन
छिह लँगिथ छे छिवान / गुलाल जूर्य

अज छु सोरुय चोनुय चोन

स्व विज ति आँस

यि ओस म्योन

म्योन यि तीर छु

तौत

दौर

व्वन्य छु यि ति चोन

बु न बु

मुय आसि सोन
तौत म्युल

यछख तु चलावुन

दपखय तु वुठन मंज रटुन

नतु सॅनिस श्रूचिस

खडस अंदर वालुन

द्वयवु त्रावि तँती

द्वन गुलि अफताबन मंज बाग

नारु ब्रेहल डाफ

अँथ्य छि वनान गछुन
द्वन कुन

बरबाट करुम

रँदि कडुम

तु

रल गछ।

(अनु०-रलश)

चु रोचख न चु

कथा कँरुम च्वर्पोय सथ

साहित्यिच अख विदा (कसुम, सिनिफ) छे 'सुमरन'। 'सुमरन' या 'यादाश'। अथ छि अंगरीज्य पॉठ्य **Remimiscence** वनान। अथ मंज छु लेखन वोल् पनुन कांह तजरुबु, कांह गुजरयोमुत वाक्, काँसि सुत्य सपदयोमुत मुलाकाथ बयान करान, प्रॉन्य द्वह याद कँरिथ। अथ मंज छि गटना पँज आसान, व्वांगव लेखन वोल् छु कथि कल्पनायि हुंद रंग दिवान तु कँह डायलाग, कँह प्रबाव (इम्प्रेसेन्स) मंज त्रावान येमि सुत्य अथ कहानी हुंद ह्यू र्वय यिवान छु।

हृदयनाथ कौल् रिंद आसन सान्यन सारिनुय परन वाल्यन वेदय। यिम छि काँशिरि अलावु उर्दू तु हिंदियस मंज ति लेखान तु वारियाह लेखान। व्वांगव पनुन्य गुजरेमुत्य तु ल्वकुचाउक्य द्वह याद करान छि यिहुंदिस कलमस खास व्वलसाव यिवान।

अँस्य छि पनुन्यन बुजर्गन तु जिंद्यन लेखकन व्यनती करान जि तिम ति लीखिन यिथय पॉठ्य पनुनि सुमरनु तु सूजिन असि।सं.

कँन्य मोहन्युव सुंजि जिंदगियि हुंद अख द्वह

—हृदयनाथ कौल् 'रिंद'

“बालक रामा। शहरुक पोछ छु पँकिथ थोकमुत। तलुबा यिमन कडतु ग्वड।”

गरिक्य जिंद्य, लालु साँबन, म्यानि ल्वकुचि माजि हुंद्य प्यता जियन, द्युत मोहनिविस फरमान। मे युथुय ग्वड कडनुक्य लफुज बूज्य मे दोपः

‘अफसूस वुनि छा यि परय? मे छि ब्रोंटुय पलहालनु प्यठ

गलवानपूर ताम सथ मील
बरमदिन्यस पॅकिथ नल द्रामुत्य तु
हठ खॅतिमुत्य। व्वन्य कडनम्
ग्वड?’

तेलि यूवद कांह शुर दरबदेरी
या दव दव करिहे, तस ऑस्य
खोचु नावान, ‘कोलु अछ गरु, ग्वड
कडया।’ मे जोन पोछ आसनु म्वखु
मा वाति मे खाँतिर कनि सजा
द्युन। सूचुम तेलि क्याह सना गव
ग्वड कडुन? यि मा गव टांगु गुर्य
सुंघ पॉदय दोहस वतु मँडिथ शामस
जंगन वाश कडनु बापथ मील जु
मील सोप सोप पकुन या टांगु
वॉल्य सुंदिस शुर्य सुंद ‘होश’,
‘होश’ वनान वनान बाजुरव मँज्य
गुर द्रन व्वन मीलन सर्वोर्य कॅरिथ
चुपंजल दवनावुन?

बु गाबर्योस। मे कति ऑस
व्वन्य त्वछ जि बु कडुहा सोप या
चोतुर पॅकिथ गज जु गज ति। मे
ऑस्य पॅक्य पॅक्य पॉद फॅलिमुत्य
तु जंगु आसम व्वकान। म्याँन्य
परेशाँनी चर्चिथ गॅयि म्यानि ल्वकुचि
माजि तु तसुंदिस प्रथ मालिन्य बाँचस
वुठन तल असन रुखु पाडु। जॉहिर
सूंचुख यि शाहरुक पोछ कोताह

अनजान छु गामुचि जबाँन्य, व्वथ
बेठि तु खातिरदोरी निशि। त्युहुंद
खंदु वुछिथ मंदुछोस बु वारय। मे
खोत कनु तेहजन तॉन्य व्वशिलुन।
सुती हुरेयम गबराहठ ति यि सूंचिथ
ति हरगाह यिमव वोन मे बालक
रामस सुत्य पकनि नेरुन मे क्याह
गुदरि। बु हयका पॅकिथ? मे हयोत
कॅह हीथ छांडुन युथ ज़न बु पकनस
ठाख हयकु कॅरिथ।

म्याँन्य परेशाँनी चर्चिथ गॅयि
म्यानि ल्वकुचि माजि तु
तसुंदिस प्रथ मालिन्य बाँचस
वुठन तल असन रुखु पाडु।
जॉहिर सूंचुख यि शाहरुक पोछ
कोताह अनजान छु गामुचि
जबाँन्य, व्वथ बेठि तु
खातिरदोरी निशि।

अकि हिसाबु ओस राह मे
पानसुय। मे पजि हे टाठि साँबस
पनुनिस प्यता जियस अथि गलवान
पूर पॅहलवानन (म्यानि ल्वकुचि
माजि हुंघन मालिन्यन) खतु पुर्ज
जॅरियि इतला दिवनावुन जि बु वसु
फलाँन्य द्वह गलवानपूर। ल्वकुचि

माजि ग्वनवती हुंज शोछ खबर
हेनि। वर्गु पाँट्य बु गछु कँन्य
मोहन्युव बँनिथ। म्याँनिस ल्वकुटिस
मॉलिस, बाँय जिगरस, ओसुख शो
र्यथ ब्रोंहय खांदर कोरमुत, लैहजा
आँस ग्वनवती वुनि माहरेनी स्व
आँस पछ ब्रोंह माल्युन वँछमुच।
श्रावन पुनिम आँस यिनु वाजेन्य।
दोस्तूर मूजुब ओस कँन्य मोहन्युव
सोजुन तँम्य सुंदन मालिन्यन अमि
बडि दोहु ब्रोंडुय स्व वॉरिव सोजुनु
बापथ वननु खाँतर।

कँन्य मोहनिविस ओस यजथ
ति बारु व्वथान। अदु येलि कँन्य
मोहन्युव सोन्य गोबुर आसि हे
यजथ ओस वारय हुरान। थजुरस
कॉलीन वथुरुन, तँकियु डँखिस,
वंदस मंज क्वट्यन प्यठ दुसु
तु जाजि कांगर अथन तल या
तपुन्य। द्वद ना, चाय ना,
टखुटचि ग्यव गिर्दु, बाँगिर खानि,
लवासु ना, सिन्य, व्वचि तु
वख्तास सति सिनि बतु ना।

कँन्य मोहनिविस ओस
स्वन्यन हुंदि मोहनिव आनु यिवान

दिनु। व्वन्य हरगाह मोहनिव्य सुंजि
जायि पनुनुय कांह यियि हे सोजुनु
तेलि ओस स्वन्यन प्यवान मोहनिव्य
ओनु प्यठय चंदु खरुच ति कँनिस
दयुन। यिथु पाँट्य आँस पनुनुय
कांह कँन्य शोछ ह्यथ सोजुनस मंज
मॉली मसलहथ।

गरिक्यव क्याजि सूजुहस
बुय कँन्य मोहन्युव तथ छु वजह।
बु ओसुस यनु बु फिकिरि प्योस
तनु पनुनि गरिक्यन अंगन
आँशनावन तु कँचन हमसायन हुंजन
व्वशन कोर्यन हुंद माल्युन तु वॉरिव
बहसियति कँन्य मोहन्युव गछान
आमुत। लिहाजा ओसुस बु अथ
कारस मंज तजरुबुकार यिवान
माननु। प्यठ ओसुस बु टाठि बुथि,
कम गो, तमीजु तँहजीबदार। गोब
गाटुल। स्वय कथ करान य्वसु पजि
तु जरूरी आसि। कम ख्यवान तु
लूदुर न लागान।

कँन्य मोहनिविस ओस अख
खास वसुफ ति ठूकिथ। राजदौरी
हुंद। ओरु योरु बावनु वरॉय द्वन
दर्यन मंज ग्राव ग्वंद तु द्वन छ्यनु
गॉमुत्यन मंज दिलन हुंज छट छठ
बँरिथ चिठि तु इजतिराब सँर्य पाँगाम

वातुनावुन्य।

कँन्य मोहनिविस ओस यज्जथ ति बारु व्वथान। अटु येलि कँन्य मोहन्युव सौन्य गोबुर आसि हे यज्जथ ओस वारय हुरान। थज्जरस कॉलीन वथुरुन, तँकियु डँखिंस, वंदस मंजु क्वदयन प्यठ दुसु तु ज़ाजि कांगर अथन तल या तपुन्य। द्रुद ना, चाय ना, टखुटचि ग्यव गिर्दु, बाँगिर खानि, लवासु ना, सिन्य, च्वचि तु वख्तस सति सिनि बतु ना। प्यठ नेरन वख्तु वतु खरुच ति। अमि म्वख ओसुस बु ति शोकु सान यि ज़िमुवारी मटि ह्यवान तु पूर करान। प्यठ स्वन्यन हुंदि फीरिथ यि वोनुम यिथु पाँदय। मे सोज़न वॉल्य बाचि बाचि अंद कुन निथ खँन्य खँन्य शेछि प्रछान ऑस्य तु मोहरन्य या माहराज़ु अलगुय चिठि या पाँगामकि जवाबु बापथ पतु ब्रोंह पकान तु कोछ दिवान ऑस्य, तँमिच टेंठ ऑस अलगुय।

अमापोज़ गलवानपूर वॉतिथ ऑस मे छेनिथ प्यनु सुत्य टेंठ हना वँछमुच। हरगाह टाठि साँबन पहलवानन इतला आसि हे कोरमुत तिमव आसि हे पलहालन प्यठ

ऑठ ऑनी डबल! 1944 हस मंज़ ओस सु अख रकम। मे ऑस्य शहर प्यठ पलहालन ताम शेय आनु किरायि दिचमुच। बु दिमा ऑठ ऑनी किनु पक्क व्वखुल्य।

सवरि हुंद केंह बौदुबस थोवमुत तु मे लोसुहन न कोदय तु वसि हे नु टेंठ। शहरस मंजुय मे आसि हे कुन गछुन मे आसि हे गरिकिस पुंचुह वॅरी प्रॉनिस ज़लुगुर्य खटारस जंगि मंजु जंग छुनिमुच तु मिनटन मंजु वथ कँडमुच। येति क्याह करुहा। सँतिमि जमाँच हुंद शुर आसनु किन्य ऑसिम न वुनि काठि प्यठ बिहिथ पैडलस ताम ख्वर वातान तु प्यठ ओस मंज़िल ति ज़्यूठ तु वथ ति अवँन्य। पलहालन टांगु अडस प्यठ पुछुम टांगुवालयन। तिमव दोपहम साँलिम टांगु लगी तु किराय लगी ऑठ ऑनी गलवानपूर वुडर दामनस ताम। वुडर दामनु प्यठ ओस वुडर खँसिथ अख मंज़िला बेयि व्वखुल्य पकुन। ऑठ ऑनी डबल! 1944 हस मंज़ ओस सु अख रकम। मे ऑस्य शहर

प्यटु पलहालन ताम शोय आनु
किरायि दिचमुच। बु दिमा आँठ
आँनी किनु पकु व्वखुल्य।

बु ओसुस अँथ्य ज्वनस जि
अँक्य बुजुर्ग हाँज साँबन वोननम,
'बबा येति प्यटु गलवानपूर छे मँज्य
खाहमिलवनुतार। चे हिविस म्वंगुरस
बापथ छुनु यि कांह मंजिल। तु
हयकख यि छाल मारान कँडिथ।
पख बु छुसुय अडवति ताम सुत्य।
अँस्य दिमव अख अँकिस अंटु
सवार्य कथु कँर्य कँर्य।

हाँज साँबस ओस नु जाँहिर
पय जि शहरुक्यन म्वंगुरन छे नु
गामुक्यन हुंज त्वछ आसान। तिम
त्रे खाहमिलवन द्रायि म्यानि बापथ
त्रे लूख।

वुनि ओसुस बु तजुबुजुबसुय
मंज जि बु दिमा बालकरामस ग्वड
किनु नु जि सु आव ग्रकु वुन्य पां
चिलमची हयथ तु ब्यूठ मे ब्रौह
कनि। अथ पॉनिस ओस नून ति
त्राँविथ युस मे पतु नन्योव। चिलमची
पँथरिस थॉविथ वोनन मे, 'थँविव
माहरा खोर यथ पॉनिस मंज'। मे
वुछ दँछुन खोवुर अमा अँघ पँख्य
बिहिथ नफरन क्याह बाव छु बुथ्यन

प्यट। ल्वकुट मॉज य्वसु बाँय
जिगरुन पॉगाम बोज़नु बापथ
वुतावलु आसनु किन्य मे नखु
बिहिथ आँस तु यस मे सु पॉगाम,
'दूर्यन कोर हिजरस हुर्यर' तसुंदि
बेहवुनुय कनस तल बोज़नोव, वँछ
मे, 'थँविव ख्वर पॉनिस मंज।
बालकराम दियिवु म्वठ।'

बाक्यन हुंजन अँछन मंज
बासेयम असनु टाँठ हिशि। बु गोस
द्रन तु त्रन मंज हयुव अमापोज
ल्वकचि माजि हुंदि वननु गँयम
हयमथ हिश तु हना पसोपेश कँरिथ
कोडुम मोज़ु तु थँविम ख्वर
चिलमची दँदरि प्यठ। पोन्थ ग्रकु
दिवुन आसनु म्वखु गोम अथ मंज
यकदम ख्वर त्रावनस वायि। खॉर,
खूच्य खूच्य वॉलिम अंकि अकि
खोर अमापोज तोत लगनु किन्य
खॉरिम वँल्य वापस। बालकरामन
छँल्य अथु पॉनिस तु अति खॉरन
पां द्रछ तु अमि सुत्य अँदरॉविन मे
ख्वर, नल तु ग़ोज़। पतु य्वसु
म्वठ तँम्य अँडिस गंटस मे खोरन
तु जंगन दिच तमि सुत्य द्राव मे
सोरुय मुस। मे बास्योव ज़न न बु
पोकमुतुय ओसुस।

बालकराम युथुय चिलमची ह्यथ व्वथुन ह्योतुन लालु सॉबन वोन, 'बालकरामन्यन अथन मंजु छु जोद। अँम्य सुंद ग्वड कडनु सुत्य छु बाल मँडिथ आमतिस ति ब्रंजिस मंजु थकुन चलान।' यिम लफुज बूजिथ लोग मे पय जि ग्वड कडुन कथ छि वनान तु मे चोल फ़ठ।

काल ख्यथ ह्यचन मे अँछ वटनु यिनि। मे मा आसुहन अख जु डिकसु ति गॉमुच। यिथिसुय मंजु वोथ शम्भूनाथ (ल्वकुचि माजि हुंद ज्युठ बोय) 'हृदयनाथ, त्वहि छे न्यंदर खँचमुच। मे वँनितव तोह्य शोंगिवा नँविस बिस्तरस किनु प्रॉनिस?' यि सवाल बास्योव मे वुठ पटांग ह्युव। यथ जवाब ओस जि, 'माहरा तोह्य छिवु मेजबान। यथ बिस्तरस तोह्य मे सॉविव बु श्वंगु तँथ्य।' अमापोज पननि शुरिलि तु ख्वश ज़ोक आसनु किन्य वोनस मे मासूमियँच सान:

'माहरा, नँविस बिस्तरस।'

यि बूजिथ छुनु तिमव बाचि बाचि असुन। बु गोस हॉरान तु खँजिल ज़द। अमा मे क्याह कांह

फ़ाथ कोरा जि यिमव छुनु म्यानि कथि प्यठ असुन। वारियाहस कालस बडि बडि असनु पतु गव तिमन म्यानि छितु गछनुक एहसास। तिम ति गय हना खँजिल हिव्य तु शम्भूनाथ वोथ मे कुन:

नतु ओस मे ति मन जि बु
रोजु दोह जु दोह गलवानपोरु
तु चमु खुल हवा, नागु बलुच
ठंडु त्रेश तु गरिचि गॉव हुंद द्रद
तु गरि ज़ोवुरमुत छ्वकु द्रद,
ख्यम कुलि प्यठुक्य म्यवु, वारि
हुंद हाख वांगन तु डोरि मंजुचि
वचि।

'माहरा त्वहि मा गोव यिथय ह्युव। मे माहरा कोरमव मज़ाख। चकि माहरा छि कथु यि जि गामस मंजु छु ग्रीस्य बिस्तर गुयुन आसान। नवि गासुक बिस्तर यथ नोव बिस्तर छि वनान छु तुरुन आसान। प्रोन बिस्तर गव सु युस गुयिन्युक आसि बन्योमुत तु युस श्वंगनु श्वंगनु सुत्य दबावन आमुत आसि। यि बिसतरु छु वुशुन आसान। खॉर, तोह्य म गँछिव ग्वतन। तोह्य

सावोव नु अँस्य ग्रीस्य बिस्तरस।'
 द्वयिमि दोह कँहवु चाय तु
 मकायि चोट तनोवुल कँरिथ तु कँन्य
 शैछ वननु पतु कँर मे शहर खसनुच
 सखर। ल्वकुचि माजि तु तसुँद्यव
 मालिन्यव कोर मे बाचि बाचि जोर
 कँह दोह रोज़नु बापथ। अमापोज
 मे ओस गरिक्यव बांद बांद कोरमुत
 जि पगुहय खँसिजि फीरिथ, सकूल
 छुय गछुन, गॉर हॉजिर रोज़नु सुत्य
 गछी पडायि हरजि। नतु ओस मे
 ति मन जि बु रोज़ दोह जु दोह
 गलवानपोरु तु चमु खुल हवा, नागु
 बलुच ठंडु त्रेश तु गरिचि गॉव हुंद
 द्वद तु गरि जोवुरमुत छवकु द्वद,
 ख्यम कुलि प्यठुक्य म्यवु, वारि
 हुँद्य हाख वांगन तु डोरि मंजचि
 वचि।

तिक्याजि बु रूदुस बँजिद
 गुरु खसनस प्यठ, लाल साँबन
 पॉरनोव गुर तु बु ब्यूडुस ग्वडुनिचि
 लटि गुरिस प्यठ। गुरिस प्यठ बिहिथ
 गोस बु स्यठाह ख्वश, मे खोत
 चिकुचाव। मे प्यव तिमव रँव्य बाँतव
 मंजु यिम बाँय जिगरनि गुरिस प्यठ
 माहराजु बँनिथ येनि वॉलिसु ब्रॉह
 ब्रॉह पँहलवानन हुंद वातनु वख्तु,

तिहंजव हमसाँय बायव गैव्य, यि
 अख मिसरु च्यतस —

गुर छुस सासस जीन संगलातस,
 यि हय जंगलातस ठेकयदार।

अँथ्य सुत्य पेयम बेयि ति अख जु
 मिसरु यादः

अँस्य न जुव खोचान थद्यन दस्तारन।
 सोन ज़िल ज़िल छुव ज़ालदारन।

तु
 कोरे माल्यो कँह नो ओय हॉसिल,
 गोबरय मोल छुय तँहसीलदार।

सारिन्य नमस्कार कँरिथ, द्वन
 जोलन मंज डालि हयथ तु ल्वकुचि
 माजि हुंद बाँय जिगरनि बापथ यि
 पॉगाम जि 'सबरस छु ज़बर फल'
 हयथ द्रास बु गुरिस प्यठ डिजि
 डिजि करान। बालक राम ओस
 ब्रॉह ब्रॉह गुर्य सुंज लाकम रँटिथ
 पकान। द्वयि गंठि पतु येलि
 पलहालन वॉतिथ बालक रामन बु
 गुरि प्यठ वोलनस मे बास्योव ओंद
 पोख ज़न नचान। मे मंदल बछन
 ततुर व्वथान। म्यानि बुथिचि द्वह तु
 गेनि बुछिथ जोन बालक रामन जि
 मे छु गुरिस प्यठ बिहिथ मुदव
 आमुत। तँमिस सपुद सख अफसूस।
 तँम्य लोद पानसुय राह जि तँम्य

थेंव न दालुविस ज़ीनस प्यठ मोट
चादर युथ न मै गॅखुर लगि हे।
सुती वोननम जिं गरु वॉतिथ गछि
द्वन च्वन द्वहन बछन रस अशुद
लागुन।

टांगस प्यठ बिहिथ हुर्यव
ततुर वारय। गरा दॅछिनिं तु गरा
खोवरि बछि बिहिथ वोतुस बु
कॅह्यताम शहर। टांगु अडु प्यठ
गरुताम पकान गॅयम कयामथ तु
ग्वबेयम सुत्य खॉर्यमुत्य जु जोलु।

गरु वॉतिथुय दिचुम यड
पॅथरिस। द्येदि येलि जोन मै छु
मुदव आमुत तमि ग्युश पॉतरि कनि
प्यठ रस अशुद तु लोगुन मै 'बलायि
हा लगय, रथ हा वंदय' वनान
वनान बुछन। व्वमपुरिच आसनु तु
ल्वकुचारस मॉहिर गुर्य सवार आसनु
किन्य ऑस स्व जॉन्यकार। अमि
पतु ति द्येदि हुंद्यव फाहव तु फ्वकव
बावजूद रूदुस बु पछस मुदव
ललुवान। यीत्य वॅरी गछिथ ति
छुनु मै सु गलवानपूर पॅछ्य लॉज
गछुन मशान।

डॉ. भूषण लाल कौलस यनामु

हाल हालुय आव डॉ. भूषण लाल कौलस तिहुंजि
कॉशिरि किताबि 'अर्जथ'-थस प्यठ बेहतरीन कॉशिरि
किताबि हुंद यनामु दिनु। यि छे कौल सॉबुन्य त्रेयिम
आलोचना-किताब तु अमि अलावु छे यिहुंजु 'प्रज्ञनथ'
तु 'व्यमर्श' किताब द्रामचु। एकेडेमी यनामु मेलनस
प्यठ छु वाख तरफु यिमन मुबारखा।

शिवस सोरि नु अतुगथ

पनुन्यन तिमनं वारियाहन परन वाल्यन हुंदि खाँतु यिमव ललदेदि मुतलक
स्यठाह बूजमुत छु मगर ललि हुंद कलामु परनस मोकु महल आमुत छुखनु, छि
अँस्य यथ काल्मस तहत विटु-विटु लल वाख पेश करान। वाख-1 अंकस मंज
तसुंदय त्रुवाह वाख पेश कँरिथ कोर असि शुबारंब। यिथय कँन्य गछव अँस्य
प्रथ अंकस मंज कमजकम आँठ-दँह वाख दिवान। युथुय तसुंदय सॉरी वाख
म्वकलन पतु तुलोन ब्योख प्रोन क्लासिकल कवी तु तसुंद कलामु ति दिमव।

पनुन मीरास नागरीयस मंज रछुन तु लूकन ताम वातुनावुन छु "वाख"
पत्रिकायि हुंद अख अहम मकसद। यिम वाख कँर्य अँसि वुन्युकताम काँशिरि
वर्नमालायि हुंदयन अछरन हुंदिस तरतीबस मंज पेश :-

- वाख-1 : अ, अँ, आ, आँ अछरव सुत्य शौरू गछवुन्य वाख।
वाख-2 : क, ख, अछरव सुत्य शौरू गछवुन्य वाख।
वाख-3 : ग अछु सुत्य शौरू गछवुन्य वाख।
वाख-4 : ट, त, द सुत्य शौरू गछवुन्य वाख।
वाख-5 : न तु प सुत्य शौरू गछवुन्य वाख।
वाख-6 : प तु ब सुत्य शौरू गछन वॉल्य वाख।

यथ अंकस मंज छि 'म' सुत्य शुरु गछवुन्य वाख शॉमिल। कँचन
वाखन छि असि नोट या व्याख्या ति दितिमुत्य। अगर काँसि परन वॉलिस कुनि
व्याख्यायि सुत्य इतिफाक आसि नु तु सु सोजि असि म्वखसर लफज्ज न मंज
पनुन्य राय, अँस्य करव स्व स्वीकार।-रलश)
(वाखन हुंद नंबर छु वाख-6 ब्रौह कुन)

55. मन पुश तय यछ पुशौनी
 बावुक्य कुसुम लॉग्यज्यस पूजे
 शेशिरस ग्वड दिज्यस जलचि दौनी
 छ्वपि मंतरु शंकर स्वात्सु वुजे

पुश—पोशिवोल, बागवान, पुशौनी—पुश सुंज जनान, पुशिन्य, शो
 रस— शेशिकल (शशि कला) ब्रह्मांडस प्यठ व्यंगलिथ पशपनु वे
 पोन्थ। दौनी—दौन्य, पोन्थ बावनुक बानु। यथ वाखस मंज छु व
 आमुत जि हावु बावुचि पूजायि बदलु छे मनुच सादना ज्यादु अह
 मंत्रव मंज छु सारिवुय ख्वतु बौड छ्वपु तु शाहुच खसु वसुय छे ज
 मानुन।

56. मारुख मारु बूथ काम कूद लूब
 नतु कारन बैनिथ मारनय पान
 मनय ख्यन दिख स्व व्यचार शम
 विशय तिहुंद क्याह क्याथ दुवरान

मारु बूथ—कौतिल बूत (भूत—संसारि तत्व), मनय—जौनिथ, मौनिथ
 होमरावुख यिम जान व्यचार सुत्य। शम—होमरावुन। विशय—विशय
 वस्तु, मादु, असलियथ यिहुंज क्या छे तु यिम क्याथ छि अटल (दुव
 बैनिथ गौमुत्य, यि पेयी चे जानुन।

57. मनुसुय मान बवुसरस
 छुर कूप नेर्यस नारु छुख
 ल्यकु ल्यख योद तुल कोटि
 तुलु तुल तय, तूल ना केह

बवुसर—संसार सागर, कूप—क्रूड, ग्वसु; तुल, कोटि, तुल तुल तूल—यिम
 सॉरी लफुज छि यि हावनु खॉतरु जि कूत ति तोलव तु चरचव,
 अपशब्दन छुनु कांह वजुन, कांह मतलब। मनस अंदरय छु सारि
 दुनियिहुक नारि जहनम, युस नाकारुगियव सुत्य बेयिहन बेमाने छु
 बनान।

58. मुकुरस ज़न मल चोलुम मनस
 अदु मे लंबुम ज़नस ज़ान
 सु येलि ड्यूठुम निशि पानस
 सोरुय सु तु बु नो केंह

मुकुर—आनु, यथ प्यठ नु गरुद ति दरान छे। ज़नस—तस ईश्वर सुंज।

59. मूड ज़ॉनिथ पॅशिथ ति कोर
 कोल श्रुतुवोन ज़डु रुप आस
 युस यि दपी तस ती बोल
 यहोय तत्वविदिस छु अब्यास

पॅशिथ—वुछिथ, श्रुतुवोन—बोजुवुन, ज़डु रुप—ज़ड तु बेअकुल बन,
 तत्वविदिस—परमतत्व ज़ानन वॉलिस छु यहोय अमल पकनावुन तु
 जुवुन प्यवान जि ज़ॉन्यकार ऑसिथ अनजॉन्य, वुछिथ ओन, बूज़िथ
 कोल तु ज़डुमोंड छु लागुन प्यवान, सारिनुय हुंद छु मानुन प्यवान।

60. मंदछि हाँकल कर छैन्यम
 येलि ह्यडुन गेलुन असुन प्रावु
 आरुक्क जामु कर सनु दज्यम
 येलि अँदरयुम खारयुक रोज्यम वारु

अँदर्युम खार्युक—मनुक गुर्य बछेर युस बड़ चंचल आसान छु।
आर—येत्यन छु अथ माने 'मुह' तु रिशतुक अन्यर युस खतुम गछनस
मंजुय जौनी छे। तमी छनु मंदछ रोजान तु लूक लजायि हुंद खोफ
पोरान।

61. मूडो क्रेय छय नु दारुन तु पारुन
मूडो क्रेय छय नु रछुन्य काय
मूडो क्रेय छय नु देह संदारुन
सँहज व्यचारुन छुय व्वपदीश

दारुन—फाकु दरुन्य, पारुन—शेरुन संबालुन मतलब क्रेयायि हुंज तयारी
मंज दिलचस्पी सान लगुन। काय रछुन्य छु ब्याख इनतिहा। सँहज बख्ती
गँयि स्वबाव तु प्रकृच अनकूल यि पानस तकलीफ वातुनावन या स्वख
दिनु वराँय सपदि। 'सँहज' नाँव्य ओस भारतस मंज अख संप्रदाय ति
चल्योमुत, यिम ताँत्रिकन हुंदिस अतिवादस (एक्स्ट्रीमिज्मस) खलाफ
आँस्य।

62. मूडस ग्यानुच कथ नो वँन्यजे
खरस गोर दिनु रावी द्वह
सेकि शाठस फल नो वँविजे
रावर्य ज्यनु कोम याजन तील

शाठस—सेक्युल क्वलु बोठ योर न पोन्थ ति खासन आसि। याजु छे
तोमलु आँटिस बनावनु यिवान तु वँहराँच मंज नेमथ ख्यनु यिवान। च्वन
लॉनन मंज छि चोर मुख्तलिफ तजरुबु वननु आमुत्य बासान, मगर चकि
छि यिम ग्वडुनिची लॉनि हुंजि कथि गेन्य कडान।

63. मॉरिथ पांछ बूथ तिम फल हँड्य
चीतन दानु वखुर ख्यथ
तदय ज्ञानख परमपद चँड्य
हिशी खोश खोरको ति ख्यथ

फल हँड्य—फल कठ (व्येद्य पूद्य) बूथ—म्येच, हवा, पोन्थ, नार, आकाश, वखुर—ग्यानु रूप्य दानु याज। चँड्य—बेकरार, चंचल मन वोल। ख्वश खोर—खोवुर (वाम) पूजा (यथ मंज मांस तु मस ति थवान छि) — तदय—तली ज्ञानख च परम पद येलि फल ख्याव्य ख्याव्य व्यँठरॉव्यमुत्य जिंदगियि हुंघ बुनियाँदी तत्व दरअसल ग्यानुकि दानु सुत्य कचि रटहख। नतु छुय अथ वाम—पूजायि ख्यथ—क्षति, न्वकसानुय न्वकसान।

64. मेथ्या, कपट, असथ त्रोवुम
मनस कौरुम सुय व्यपदीश
जनस अंदर कीवल ज़ोनुम
अनस ख्यनस कुस छुम दवीश

जनस अंदर—लूकन (समसार्यन) अंदर अनस—ख्यन चनुक बीद तु वश या तिमय छु बॅल्य। दवीश—हिंदी 'द्वेष' मतलब जिंद, वॉर, मगर येत्यन गछि अमि लफ़्जुक माने दूश याने 'दोष' मतलब राह या कमी या कसूर आसुन।

(जॉरी ब्रोंह कुन)

कॉशुर बूलिव तु बोलुनाँविव

પનુન્યન પરન વાલ્યન કૌશિરિ શૌયિરિયિ હુંદિ મીરાસુચ જાનકૌરી દિનુ ખૌતરુ
છિ ઍસ્ય યથ કાલ્મસ મંજ સૂફી શૌયિરિયિ હુંદય કેંહ નમૂન દિવાન। ઍકિસ
ઍકિસ અંકસ મંજ દિમોન અખ અખ શૌયિર। વાચ-1 હસ મંજ પોરુ ત્વહિ
હબીબ ઉલ્લા નવશહરી સુંદ કલામુ। તસુંદિ પ્યટુ છુ સૂફી (યાને ઇસ્લૌમી
રહસ્યવાદુચિ) કવિતાયિ દસ વ્થાન। સૂફિયન હુંદિસ કલામસ તરતીબ દિનુ
વોલ આલોચક સ્વ મોતીલાલ સાકી છુ લેખાન- “સૂફી સુંજ વથ છે
અશ્કુચ તુ પાન પુશરાવનુચ (અર્પન કરનુચ) વથ। આશકસ છુ અશ્કુન જલાવ
અંદરી વુહાન તુ અમે અશ્કુચિ બ્રેહુ છે કાઠ કંઢિથ બાજે શાર બૈનિથ થનુ પ્યવાન।
યોહય અશ્કુન જલાવ છુ આશકસ છેકરસ મલ ત્રાવાન જૌલિથ યેમિ સુત્ય તસ
રુમ રુમ શોદ તુ સાફ છુ ગછાન। ...સૂફી શૌયરી છે સોન મ્વલુલ તુ મૌર્યમૌદ
સરમાયિ।”

વુનિસતામ કૌર્ય અસિ યથ કાલમસ મંજ નવશાહરીયસ અલાવ મૂમિન, સ્વછિ
ક્રાલ, શાહગફૂર તુ કરમ બુલંદ શૌમિલ। વ્વન્ય છે મશહૂર સૂફી શૌયિર રહમાન
ઢાર સુંદિ કલામુ મંજ વારય પેશ।

ઢાર ઓસ 1850 હસ ઍદ્ય પૅચ્ચ છચ્ચબલ, શ્રીનગરુ રોજાન। હાલાંકિ તસુંદ
સારિવુય ખ્વતુ મશહૂર બૌથ ઓસ ‘શશરંગ’ વ્વંગવ તસુંદ્ય બેયિ વારિયાહ બૌથ તિ
ગૌયિ લુક ટૌંદ્ય તિ તિહુંદ મેછર છુ તિમન વુનિસ તામ જિંદુ થૌવિથ।

1) તોતુ ચોલુમ હારિ : રહમાન ઢાર

તોતુ ચોલમય હારિ લોલો	પ્યટ હુ થરિ હુંજિ ક્યારિ લોલો।
ખંદુ કૌર્યથુય દિલ કતુરનમ	અમિ શમશેરિ દારિ લોલો।
બોલ બોશસ દિલ હુ લૂબાન	અમિ ગુફતારુ માહિ લોલો।

लोल चोन आम जुलयखाये
लोल त्रावथस मँजनूनो
वाटु थोवथम बेयि वातय
शोकु चाने खून हागन
ब्रांटु चाँनिस अँशकु तीरस

मंज मिसरस छारि लोलो।
प्यठ नँजदस गारि लोलो।
वनतु कमि सनु वारि लोलो।
छुम अँछव किन्य दारि लोलो।
सीनु 'रहमान' दारि लोलो।

2) मालु दँय करसे हिये

अँन्य तोन लालु सालु तय
त्राव गोसु मलालु तय
क्रोत गोम परजन मोत गोम
दूरेर वु ति नय चालु तय
यनु तँम्य बाल मँशगँवनस
अजलन लाँजनस जालु तय
जाह ति नय पँज कथ ब्राँवनम
बाल मुशनस मालु जानु तय
सारे पान पुरिथ द्रायस
नाँल्यमालु बेयि वाँल्य चालुतय
माहरोय गुल तु आँव्युल मेय
लाँजनस मूहने जालु तय
बुरु म्यानि येलि अन्नि यीद करु
ताबुवुन माहि शवालु तय
'रहमान डार' दर यिन्तिजार
अशकन कोरनस कबालु तय

मालु दँय करसे हिये
मालु दँय करसे हिये
पोत फेरिना यूर्य यिये
मालु दँय करसे हिये
पशनाँवनस चैय थिये
मालु दँय करसे हिये
हाविनम अपजय द्रये
मालु दँय करसे हिये
आयस अँशकुनी छिये
मालु दँय करसे हिये
ख्वशबोय तस कुस नु निये
मालु दँय करसे हिये
दीदव वुछहन खये
मालु दँय करसे हिये
जोरवार अँशकुनार छुये
मालु दँय करसे हिये

कॉशिरिस मंज ति छे. बाकय ज़बानन हुंदय पॉटय जेछन नज़्मन या महाकाव्यन हुंज परंपरा रुजमुच। 15 हुमि सँदियि मंज लीछ ग्वडनिच जीठ कविता अवतार भट्टन- 'बाणासुरवध कथा'। तमि पतु लेछि फारसी असरस तल शॉयिरव मसनँवियि। मसनवियि आयि 70-80 वॅरिय ब्रॉट ताम बराबर लेखनु। 17 हिमि सँदियि मंज चलेयि पुरानु कथायन प्यठ मन्नी जेछन कवितायन या महाकाव्यन हुंज ब्याख परंपरा येम्युक दस साहिब कौल सुंदय 'जन्मु चर्यथ' सुत्य वोथ। मगर यिछन सारिनुय कवितायन मंज छु प्रकाश राम कुर्यगॉम्य सुंद "रामावतार चर्यथ" सरस। कुल आयि 9 'रामायन' कॉशिरिस मंज लेखनु, मगर "प्रकाश रामायन" - नस वोत नु लुकुटाछु किन्य या सँहल कथात्मकतायि किन्य कांह। "वाख" करि यिमन सारिनुय महा काव्यन हुंदय मुख्य अंश सिलसिलुवार पेश। - (मूल जबॉन्य तु स्टाइलस मंज)

बुनिस ताम (वाख-1 प्यठ वाख-6 हसताम) पोरवु त्वहि तोत ताम येलि भरत जी राम जियिन्य खाव ह्यथ वापस अयोध्यायि यिवान छु। वन्य पॅरिव ब्रॉह कुन। कथायि हुंद सिलसिलु छु असि बरकरार थोवमुत, यौद जन मंजु कुनि कुनि जायि जेछरु (युस बचॉविथ ह्यकव) निशि बचनु खॉतर कांह कांह शार त्रोवमुत छु। कथायि अलावु छे अथ ग्रंथस मंज वारियाह लीलायि यिमु लयि तु संगीतु बॅरिथ छे।

हॅरीहरु कोनु छुख दर्शुन मे हावन

दज़न छुम मन कथन कन कोनु थावन

हॅरीहरु क्वकर्मन हॅस्यतिस कोरुन बंद

करायन जोरु बल वोतुस नु कॅह अंद

शारन अदु गोय छुहन तति म्वकलावन

हॅरीहरु कोनु छुख दर्शुन मे हावन

शरन गवना चै कुन वनि म्याँन्य ज्ञात
 तवय गोम रॉच द्रह दोहस गॅयम रात
 चु छुख गचि रॉच सुबहा फवलनावन
 हॅरीहरु कोनु छुख दर्शुन मै हावन
 गलन छुस राखिसन सुत्यन गॅयम कॉम
 अलन छुस व्यगनु सुत्यन अनि गोट गोम
 चु अमि अनि गटि अँदर छुख गाश हावन
 हॅरीहरु कोनु छुख दर्शुन मै हावन
 चलन छुस नारु व्यगनुकि निशि बोट ज़न
 वुछन छुखना शँतुर छुम पतु सुह ज़न
 चै वोनमुत छुथ सुहस अथि गाव चावन
 हॅरीहरु कोनु छुख दर्शुन मै हावन
 ग्यानुक केलु फल डल ओस त्रोवमुत
 शरीरुक चर छु शालस अथि आमुत
 चै छुत वोनमुत चरस अथि शाल ख्यावुन
 हॅरीहरु कोनु छुख दर्शुन मै हावन
 बु कूताह चानि दर्शुनु पुछि व्वदॉसी
 व्वदॉसी कोनु तिम यिम बॅखुत्य ऑमी
 अँशिस सुत्य रथ छुना प्रहलाद हारन
 हॅरीहरु कोनु छुख दर्शुन मै हावन
 सु कस वनि येम्य नु वोन पननिस मनस रात
 ब छुस खोचान तॅमिस लोगमुत परुद्यगात
 तवय कर छुस अँमिस निशि सीर बावन
 हॅरीहरु कोनु छुख दर्शुन मै हावन
 यि कॉसिद मन दपस अन खत किताबत
 येत्युक तोत या तत्युक योत अनि शोछ कथ

करुन अथ गश तु र्यथ चैथ ओश छु त्रावन
 हँरीहरु कोनु छुख दर्शुन मे हावन
 अँमिस आँस जिमु काँमा खत चै निशि न्युन
 यिमा खत रँटिथ बंदुत चँटिथ द्युन
 अँकिस कथि हथ पनुन छुस मिलुनावन
 हँरीहरु कोनु छुख दर्शुन मे हावन
 बु छुस जंगल रँटिथ ओन राख्यसव ग्यूर
 वुछिव मा वुनि मे बोद मन कोर कुन फ्यूर
 तिछ्य गथ छय छु हँस्यतिस मोह पावन
 हँरीहरु कोनु छुख दर्शुन मे हावन
 यि मन कर छुय पँथुरु कनि पुर्य थावन
 छु मुचरन मोहरु वासन बाँगरावन
 खरस सुंद माँछ हो ख्यावन तु चावन
 हँरीहरु कोनु छुख दर्शुन मे हावन
 न छस रातस न्यँदुर न छुस द्रहस कार
 चलन दँर्ययाव ह्यू लब तशनु कुनि नतार
 शिन्याहस प्यठ यि छुय बँस्यती बसावन
 हँरीहरु कोनु छुख दर्शुन मे हावन
 द्रहस रातस छु कम कम जाल वोनन
 सुवन कपटन चटन वोनन तु दोनन
 हवनर कँछाह छे हैछमुच अँम्य हवावन
 हँरीहरु कोनु छुख दर्शुन मे हावन
 अमा येलि सुतर खॉरन खुर छु कासन
 द्यदव वनुनाव प्वफन, पेचन्यन तु मासन
 दियी मेतरुत कँरिथ कुक्यलन त कावन
 हँरीहरु कोनु छुख दर्शुन मे हावन

सदाशिव पानु यिम योत मन करुम साफ

करुस शीनस करान यी श्रावनुन ताफ

चटुन यिम पर व्वपर छिम लरि सावन

हॅरीहरु कोनु छुख दर्शुन मे हावन

वुछन लोसम नेतुर योत यिख प्रबातन

गोवुय क्याह चेर वुनि छुख कोनु वातन

मे छुम यी आश यिख प्राकश त्रावन

हॅरीहरु कोनु छुख दर्शुन मे हावन



गॅयस कयकी भरत ह्यथ बेयि वन्यानस

वौदुन त्युथ युथ छु रंग फंवार आबस

गॅयस कयकी तोतुय वॅन्यनस स्यठा जार

मे बखशुम यॅच गॅयस पापन गिरिफतार

खबर कॅह छमनु व्वन्य वनु क्या दयस बो

करुन तस आसि यी पाँपी गॅयस बो

खबर कॅह छमनु येति बोजनु क्याह आम

सपुन दिल सोख्तु बाज़र पोरख्तु गव खाम

दिचुम पानय बॅरिथ गरदन ब शमशेर

दोपुम पानय जुवस पननिस न्यबर नेर

दपन छस व्वन्य जॅमीनस तल गॅछुम जाय

छसय पालुन्य चु कॅछाह व्वन्य करुम पाय

व्वथुम थोद पोशि थॅर छस बरु गॉमुच

वुछन छुखना बो ज़न आकाशि पेमुच

असन दोपनस चु गछ छख म्यॉन्य माता

कुनुय लॅज क्या चु कयकी क्या कौसल्या

चु कॅह द्रख बॅर्यजिनु येमि चलनु साने

दयन यी ल्युखमुत ओस करमु लाने

ग्वडु सुंद वनुन

लाव्यन तजरुबन हुंज शॉयिर

—ओम कार कौल

सुनीता रैना आँस ग्वडु—ग्वडु हिंदियस मंज शॉयरी करान।
‘चिनार के आँसू’ नॉव्य छपेयि यिहुंज ग्वडनिच शॉयरी हुंज सोम्बरन
1998 तस मंज। पतु हयोतुख कॉशिरिस मंज लेखन।

‘मनसर न्यूनम’ छे सुनीता जी हुंज कॉशिरिस मंज चूरिम शाउ
सोम्बरन। अमि ब्रौह छे ‘रिहिज याद’ (2001), ‘सौंजल’ (2003) तु ‘पोत
जूनि वॉथिथ’ (2004) शाउ सोम्बरन छपेमनु।

यिमव कोर अँजिचि कॉशिरि ज़बॉम्य हुंजि गज़ल—शॉयरी मंज
कमसुय कालस मंज जान नाव हॉसिल। यिहुंज केंह गज़ल छि अंग्रीज़ियस
मंज ति तरजमु आमुत्य करनु। यिहुंदिस गज़लस मंज छे असलूबी रयवायथ
बरकार आँसिथ ति बावुच रँग्य वारियाह नवेर नज़रि गंछान। यिहुंज शॉयरी
छे स्यदि—स्योट आँव्यल्यन एहसासन, यादु वेंतरिस तु लाव्यन तजरुबन
जैव दिवान। बाँव्यमितेन खयालन मंज छु त्युथ सेज़र तु पज़र, युस कौसि
ति पानस कुन छु फिरान तु आसांनी सान मुताँसिर करान। शॉयिर छे कॉशरि
ज़ाबॉन्य हुंद्य आम फँहम लफ़्ज़ तु महावर वरतावान। यिहुंज लफ़्ज़—चॉर
तु असलूब छु यहुंद्यन खयालन स्यठा सादुगी सान बावथ करान। कुनि ति
जायि छुनु कांह ति लफ़्ज़ फज़ूल बासान।

यिहुंज शॉयरी छुनु कुनि अकि कुस्मुकिस जैहनी दॉयरस मंज
काँद। अथ मंज छु मोज़ू रँग्य वुसजार। ज़्यादु तर छु रावन त्योल,
अलगाव तु बेकराँरी हॉवी। कुनि—कुनि जायि छि परछेनि लोलुक्य
अहसास ति हुंद्य गछान। सुनीताजी छुनु कुनि ति खास व्यचारदारायि

या फलसफस ताबेह।

येति करव अँस्य यिहुँदय केंह शार पेश, येमि सुत्य यिहुँदयन
मोजूअन हुंज शिनाख्त सपदि। यिम शार छि ज़बॉन्य — वरतावु किन्य
ति अँहम।

शॉयिर छे हालातन हुंजि बेबसी, यथ मंज अरमान छि रावान,
यिथुकन्य जेव दिवान :

अरमान दिलुक्य मनसॉव्य द्वहय,
ज़न म्वख्तु हलम छँकुरॉव्य द्वहय।
आज़ाद नबस तल वाँस कँडिथ,
मंज खाबस गरु ललुनॉव्य द्वहय।

यस येति केंह रावि तमिच याद मा छि आसॉनी सान मिटान।
यिथिस रावन तेलिस छे यिथु कँन्य बावथ सपदान :

तथ गरस पान व्वथुरुम शिवाला दँपिथ,
रॉछ कँरमस तु ठोकुर ति नोवुम द्वहय।

पनुन गरु रँछरनुच कूशिशा छे करान:

वावु रिंगि वादु हैथ दारि ताकस पेठन,
व्रोंग जॉलिथ मे कुठ गाशुरोवुम द्वहय।

शॉयिर छे हालातन हुँदिस आवलुनिस मंज गीर गँछिथ पनुनि
सादुगी कोसान तु पनुनिस वजूदस प्यठ ति सवालिया निशानु लागान:

येमि सादुगी कौरुम छल नतु आसिहे अँछन तल,
सोंतुच स्व तेज वुजमल स्वय प्रॉन्य हिश फरागथ।

नु छु म्यानि जुवनु मतलब न वकील नय शहादथ,
यि छे रॉव्यमितिस मुकामस खाबन मंज वातान तु बेयि सुय गुलज़ार
छावुन यछान:

गेविम नगमु जोरा, पँचिस ब्रोंह तु द्रायस,
अमा आँकवुनि ठीक शहरस बु चायस।

वौनुम हरदु रॉल्लिस जि सोंतुच कथा कर,
 वु यचकॉल्य यथ सरजमीनस प्यठ हा आयस।
 अथव खून वथरुम मे छ्वकुलद गुलालन,
 दुआ कॅर्यजि पेयि बागवान सोन पायस।

शॉयिर छे वसलुच व्वमेद दिलस मंज जाय करान तु पनुन्य
 बेबसी बावान:

अज छुनु बरु प्यठु गारान कांह,
 वुनि छि दिलस मंज कल किछताम।
 बेयि वुछहन बेयि हावस पान,
 यिति गोछ आसुन पानस ताम।

बचपन कयन दोहन हुंज याद तु क्रेछर पजर छे यिथुकन्य बावान:

याद छुम ल्वकुचार फोल तथ बोनि तल,
 म्योन स्वॅर्य स्वॅर्य आसि मा गॉमुच ग्वतन।
 चैति वौनुथ ल्वति पॉठ्य व्वन्य समखव नु जांह,
 मे ति कॅरुम लवु ज्ञन तिमन प्रानन वतन।

अँशकुच पहचान छे लाचॉरी य्वसु खटिथ छुनु रोजान:

तस छु अँशुक रुम रुम फोरमुत
 यारस निश लाचार वुछुम।

शॉयिर छे पनुनि बेबसी हुंज हालथ नागवार। यि छुनु काँसि ति
 यि चेनुनुच सलाह दिवान:

म्यानि वखतुक आँनु वुछि जि न काँपख,
 म्यानि दोरुच काँह कथा पॅर्य जि न जाँह।

यि छुनु काँसि हुंद दिल दुखावुन यछान। पनुनिस काँतिलस ति छे
 आय काँछान:

तॅम्य तुल पानय जखमन क्रोर,
 बेयि दितुनम दगि हुंद इल्जाम।...

कुनि अंदु रूद न काँतिल पथ

मेति सूजुम जुवनुक पाँगाम।

शाँयिर सुंज ल्वकुट ख्वतु ल्वकुट खाँहिश ति छनु पूर गछानः

कृत ल्वकुट अरमान मंजोमस,

पनुनि हिसुक असमान मंजोमस।

यि छे दिलुक्य दौदय मँशरावुन यछानः

नगमु जाँनिथ गेव्य तु ल्वचराँविम तवय,

काँल्य कालय दौदय मँशराँविम तवय।

दिलुच खोशी छनु तस यछनु सुत्य मेलानः

छनु खोशी खाँराथ मुख्य दौरिथ मंगव

गंड दशान चान्यन मुचराँविम तवय।

तूफानन मुकाबलु करनु बापथ गछि पूर सबील या तयाँरी आसुन्यः

तूफानन क्या खालव राह,

- यथ गँछ आसुन्य नाव बदल।

शाँयिर छे बडि खोतु बडि मुसीबतुच शिकार गँछिथ ति सम्बलानः

मारनन तिहिंदय मै जुवनुक जोश द्युत,

म्यानि जुवनुच व्वन्य तिमन कँर्यतव खबर।

जिंदुगी हुंद जोश छु काँसि हुंदिस नगमस ताबह, युस वनि कडुन मशिकल छुः

छे अछरँछ वँन्य दिवान दोरान,

वनी छुनु कुस छु वायान नय।

शाँयिर छे अँशकनि मँस्ती यिथुकन्य ज्यव दिवानः

छेपल छा़य रटुन्य गँछ

द्वछव माय रटुन्य गँछ

शबस गँछ गिंदुन्य किछ

दोहस पान खटुन्य गँछ।

अँशकस मंज मनुच बेकराँरी छे यिथुकन्य बावानः
 गीर्य दिलन कँर्य अँदय पँख्य गथ,
 म्वछि मंज कँम्य रोट चलवुन आब।

यि छे बुर हालतन मंज गरन हुंज खोफनाख खामूशी यिथुकन्य ज्यव
 दिवानः

छे बाँच गरन मंज खामूशी,
 यिछ छनु हरगिज शुमशानन व्वन्य।
 शाँयिर छे दिलुच बेकराँरी यिथु कँन्य हावानः
 करि तु बराबर कदमन मीठ्य
 चलि तु गछ्य ज़न दुपहँर्य छा़य
 चेति किथु नाहकय व्वाँदि रँछमुच
 बेआरन हुंज यीचा माय।

इनसानस किथु कन्य छि दिलुक्य गम छुपावुन्य प्यवान। पनुनि दिलुक
 बार छु ओश त्रावान ल्वचरावान, सुती छुनु यछान काँसि ति बास द्युनः
 मे येलि ति चेशमन गुबार ल्वचरोव,
 वुठन थोवुम ग्वडु वछर बचाँविथ।

यिथुकन्य छे विशयन हुंज रंगारंगी सुनीताजी हुंजि गज़ल-शाँयरी मंज
 बरपूर। ज़बाँन्य वरताव तु शौली हंदि ऐतिबार ति छे यि शाँयरी अँहम।

मनसरु च्युनुम, शाँयिर सुनीता रैना पंडित,
 साहिबाबाद, यू.पी. 2006, म्वल 275 खपयि।

कुस मरि तु कसू मारन
कुस मरि तु कसू मारन

पनुन्यन परन वाल्यन, सान्यन बँहलि पायि स्वर्गवाँसी साहित्यकारन
(यिम पँत्यम्यन पंचाहन वँरियन मंज गुजरेयि) हुंद प्राथमिक परिचय
दिनु खॉतरु छि अँस्य यि कालम शोरु करान। शोरुआत करव अँस्य
स्व. सर्वानंद कौल 'प्रेमी' सुदि सुत्य यिम अवलि मँयी 1990 शहीद
सपुद्य।

शॉयिर प्रेमी युस आज़ादी हुंद सिपाह ओस

स्व. प्रेमी जाव अनंतनाग ज़िलु किम सोफ शाली मंज नवंबर
1924। पंजाब युनिवर्सिटिय प्यठु कोरुन 1939 यस मंज मैट्रिक पास तु
कश्मीर युनिवर्सिटिय प्यठु कोरुन पतु हिंदीयस मंज एम.ए. मेरिटु सान
पास। तँम्य कॅर नोकरी खँदर बंडारु प्यठु शोरु तु 8 ठन वँरियन रूद
गांधीदर्शन परान तु समजान। सु रूद भारतकिस आज़ादी आंदोलस सुत्य
सेदि स्योट बाजे वरगु पॉठ्य जुडिथ। 1945-47 दोरान न्यून 'कश्मीर
छोड दो' आंदोलनस मंज हिसु तु कृति फिरि कोरुख गिरिफतार। कबॉल्य
रेडु वरखतु कॅरुन कल्चरल फ्रंटस मंज पॉकिस्तॉन्य प्रोपगंडाहस खलाफ
लीखिथ सरगर्मी सान कॉम। पतु ल्यूखुन 'खिदमत' तु 'देश' अखबारन
मंज, हलांकि ओज़कु खॉतरु पेयस रियासतु न्यबर पंजाब सरकारस तु
मरकज़ी सरकारस मंज कँतु कालु खॉतरु नोकरी करुन्य। 1954हस मंज
आव वापस तु तॉलीम महकमस अंदर लॅजुस माश्टरी तु 23 हन वँरियन
रूद मुख्तलिफ सकूलन मंज परनावान तु दार्मिक बराबरी तु बरादरी हुंज
शेछ सारिनुय वातुनावान।

प्रेमी ज़ियस रूज ग्वडु प्यठय बड्यन शॉयिरन हुंज सरपरस्ती

हॉसिल। 'महजूर' ओस अँमिस हमेशि पनुन अथु प्यठ थॉविथ। पनुनि 6 जून 1928 चि डायरी मंज्र छु महजूर लेखानः (उर्दूहस मंज्र)

'मोए सर्वानंद प्रेमी, गवर्नर साहब के घर गया। मुतसल पोलोग्राउंड टांगे पर। गवर्नर साहब का मेहमान। एस एस चौहान मिला। शेरेशायरी का तजकिया रहा। कश्मीरी शायरी पर नोट लिखाए।'

'पांचादर' नजमि मंज्र छु प्रेमी पानु मानान जि सु छु महजूर सुंदि सुत्य मुताँसिर।

लोलस ब्योल गलि तिति ना साँ बनि जांह
जून पेयि छलि छलि तिति ना साँ बनि जांह
अपुजुय केंह काल युवदवय रथि खसि
पजग्म न्याल गलि तिति ना साँ बनि जांह।

दपान 'पांचादर' सौबरनि अकैडमी हुंद मॉली मदद मेलनस थोवहस शरत जि नाव थावुस 'आबशार' युस न अँमिस मंजूर ओस तु न रँटन सत्सिडी।

प्रेमी जी सुंज्र यिमु किताबु छे कॉशिरिस मंज्र आमचुः

कलामि प्रेमी, पयामि प्रेमी, रूदु जॅर्य, आश तु व्वश, गीतांजली (टैगोर सुंद अनुवाद), रूसी पादशाह कथा, पांचादर, बख्त कोसम, आँखरी मुलाकात, मथरा दीवी।

उर्दूहस मंज्र छाप गॉमचु किताब छे यिम'

कश्मीर की बेटी, मिर्जा काक (जीवनी), भगवद्गीता (तर्जम), ताज त र्वप भवानी (हिंदी), हमारे महजूर (उर्दू), परमाथ शतक (हिंदी)।

मगर यूताह प्रेमी जी सुंद कलामु छप्यव तमि ख्वतु ज्यादु छु ति यिनु छपॉविथ ह्योकुन। तम्युक फिहरिस छुः

भगवद्गीता (अनुवाद), रामायन, केंह दार्मिक कथु, आलथ, ललीश्वरी, मदुशाला।

तंसुज्र अंगरीज्य किताब छे :

1. My Pious Father

2. Tears of Love and joy

3. Spiritual Doses

4. Utterances of Premi

5. Mirza Kak Ji

आजकल (उर्दू) छु जुलाई 2002 किस शुमारस मंज प्रेमी जी निस तर्जमस मुतलिक लेखान:

‘सर्वानंद कौल प्रेमी की श्रीमद्भगवद्गीता, उर्दू तर्जमा भी है और तफसीर भी।... इसके इब्तदाई हिस्से में 24 शखिसयात की मुक्तदिर आरा भी दर्ज हैं। मुतर्जिम प्रेमी ने किताब को तीन हिस्सों में तकसीम किया है।... पहले हिस्से में 46 लेख शामिल है। ये मुख्तसर होने पर भी गीता जी को पूरी तरह से समझने में मदद देते हैं।...’

अमि तर्जमुच अख मिसाल छे:

शोरोशर ऐसा वहां पर यक कलम बर्पा हुआ

यह ज़मीं यह आस्मां, यह लरज़हा यह इन्तिहा

शोरोगुल सुन सुन के कौरव का जिगर फटने लगा

हर तरफ जब कौरवों की फौज में छाई निशा

प्रेमी सुंजि शायरी हुंज़ अख मिसाल:

दिलन मंज शवज़र तय पज़र आसिहे

अँछन मंज ति लोलुच नज़र आमिहे

गँमच आमिहे क्याज़ि रुम आँविल्यन

ज़ि यवदवय न रायन हज़र आसिहे

बुल्लान युस छु सासन मरान राथ द्रह

अमा तस अम्युक जांह अमर आसिहे

अर्जुनदेव ‘मजबूर’ छि प्रेमी जियस मुतलक लेखान:

‘प्रेमी ओस आँलिम। सु छु मे अक्सर कांह नतु कांह किताब

बैगस मंज या बगलस मंज हयथ दवान बुल्लमुत। तसुंदि बगौर छु मे अनंतनाग खाली खाली बासान। तसुंद आसुन मा आसि बुनि अनंतनाग

क्यन बालन गथ दिवान। तसुंद रूह मा आसि वुनि क्वकर नागु किस मोदरिस आबस तु गुलाब बागस मीट्य करान, ग्राव करान तु वनान — 'बेकसूर आसिथ क्याजि आस बु छलि छलि करन?'

सर्वानंद कौल द्राव 1 मई 1990 पनुनिसय गामस मंज पनुन्यव चाटव, जॉन्यकार लंडकव अगवा कॅरिथ शहीद करनु। सुती कोरुख तिहुंद लडकु वीरेंद्र ति बेददी सान शहीद। येम्य सॉरुय जिंदगी बाँय बंदुत तु मिलुचार खॉतरु सरुफ कॅर तॅम्य दिच यिमनुय मूल्यन तु कदरन रॉछ करान करान बडि ख्वतु बॅड क्वरबॉनी।

महजूर सुंदी पॉट्य ओस प्रेमी जी नॉदिम सॉबन ति सॅही प्रजनोवमुत। 1958 ई. मंज छु लेखान :

'कोताह वुछ तु वलवल ओस (1948 ई. मंज कल्चरल फ्रंट क्यन द्वहन दोरान) तहुंदन स्यद्यन ब्वद्यन शारन मंज... ख्वश तमीज तु ख्वश कलाम नवजवान... बु ज्ञानन प्रेमी शॉयिर, यस दिलस मंज लोल नार तु इनसान सुंद दोद छु नारु ब्रेह सगवान...'

मजबूर सॉब छि बेयिस जायि लेखान:

तसुंद दरुम ओस इनसॉनियत रथि खारुन्य तु जायि जायि ग्यानुक प्रकाश वातुनावुन। शायद अवय रॅट तॅम्य पनुनी दरती। पनुन टोठ नेचुव ह्यथ गव प्रेमी बिना कसूर शहीद...'

नामवर पत्रकार श्याम कौल छि अॅकिस जायि लेखान:

'1989 अंद क्यन तु 1990 ग्वडु खौफनाक द्वहन येलि अकलियती बटु समाजस थर आँस, प्रेमीयस मुतलक वोन न काँसि जि सु क्याह ओस शरारथी ज़बान बोलान। सु ओस शॉयिर तु जज़्बाँत्य अवय ओस खामोश ओश त्रावान तिक्याजि दहशत तु कटरपंथियि आँस वादी हुंज वाँसुवादन हुंज तु अमनु सान सुत्य सुत्य लसन बसनुच र्यवायथ चॅटिथ तु फुटरॉवथ त्रॉविमुच...'

डॉ. र.ल.भट्ट छि लेखान:

‘प्रेमी हेकिहे बड़ आसॉनी सान अवॉमी लीडर बॅनिथ। तसुंद असर तु रसूख ओस ज़ातन तु आस्थायन, तहुंदिस गामस तु अलाकस अपोर तॅरिथ कोत वोतमुत... कुलस प्यठय वुछव तु अँहुंज ज़िंदगी मुतलक छुनु तिति लेखन आमुत येम्युक सु हकदार छु। हालांकि कुत्यन अंज़रन गंज़रनस लायक शख्सव छु तहुंदि मरनु पतु तिमन रदांजली दिवान वारियाह कॅह वोनमुत...’

बेशक प्रेमीजीयस आव शहीद गछनु पतु सरकारुक यनामु दिनु तु तिम कोमी शहीद करार दिनु, मगर बस कथ बीठ तॅती। गवर्नर जगमोहनन वोन, ‘स्व. प्रेमी ऑस्य नामवर शॉयिर, पत्रकार तु किताबन हुंघ लेखक’। डॉ. कर्णसिहन वोन : ‘सु ओस अहम कॉशुर साहित्यकार तु शॉयिर। तसुंघ बेरहम मोतन ओन मुलक्स मंज़ इनकलाब।’ शफी कुरैशी: ‘प्रेमी जी सुंदि मारु गछनु किन्य सपुद असि कश्मीरकि अकि गोबरु सुंद न्वक्सान।... सु ओस आज़ादी हुंद सैनिक, बोड ऑलिम तु समॉजी कारकुन। म.ल.फोतेदार : ‘प्रेमीजी ओस साहित्यिक कामि तु कॅशीरि हुंदि बाँयचारकि तरकी तु जातीय यकतिस तरकी दिनु किन्य मोशूर।’ टी.एन. कौल : ‘श्री प्रेमी ओस देशबख्त, शॉयिर, व्वस्ताद तु बाकुय मुल्कस सृत्य जम्मू कश्मीर रियासतक्यन दर्यन रिश्तन मुतलक तसुंज रायत्राय बनेयि जहाघन हुंदि नाराज़ गियि हुंद वजह।’ भैरो सिंह शेखावत : ‘श्री प्रेमी ओस न सिरिफ अख नामदार आज़ादी सैनिक बल्कि मुल्कुक जान साहित्यकार ति।’

(रलश)

देवनागरी कॉशुर परुन तु लेखुन छु सँहँला।
पनुनिस द्वहदिशकिस वर्तावस मंज़ अँन्यून।

स्वखन डूस

पं. स्वखानंद सुंजु कथु बूजिथ यियि मोहन्युव तंग, दपि गरि कोनु
द्रास जंग वुछिथ युथ यि समखेहम नु। मगर सु येमि द्रहु नु समखि,
क्याहताम कमी छे मनुशस बासान। यिथय कॅन्य प्यव अकि द्रहु
'वाख' किस दफतरस प्यठ वॉतिथ, गिलु कोरुन जि वुन्युस ताम वोत
नु पनन्यन जॉहिर कॅर्यमुत्यन खयालन मुतलक काँसि हुंद खत पॅतर
तस निश। मगर दॅस्ती दिचुन सानि गलतियि प्यठ माँफी तु तुजुन
पनुन्य ब्याख फेवरिट कथु लॅड। सवाल ति कॅरिन तु जवाब ति
दितिन पानय। पानय वोनून जि स्वखन डूस छिम गॉमुत्य। बूजिव
क्याह वोनून येमि लटि।

‘मतबीद’ साँबन्य अहमियथ

—स्वखानंद

हे महारा, तोह्य क्याजि मे फोन कॅर्य कॅर्य ग्यूर तुलान? पतु
येलि नु बु समखान छुसव तु छिवु नाराज गछान — हे गरि छुख नु
आसानुय।

हे महारा बु छुस गरी आसान। मे गछुन कोत आसि? नोकरी
निशि रिटायर गोमुत। काँसि वानुवाँलिस या लालस निश छुस नु
मुनुशगॅरी ति करान। तिमन छि म्यानि ख्वतु जवान लॅडकु बनान यिम
बेकार छि। कमय तनखाहस प्यठ ति छिख बनान। व्वन्य कति पृछन
तिम मे हिव्यन बुडन। बु छुस गरी आसान बिहिथ द्रंबु फुटुरावान। मगर
यि ति छु पज़र जि येलि येलि त्वहि फोन कोरवु तेलि ओसुस न बु गरि।

हे महारा चंदु फोन छुम न ओनमुत। सु तुलुहॉ सुत्य तु अदु

हेकिहीव तोह्य मे कुनि ति जायि रँटिथ। मगर सिरिफ अवय किन्य अना बु? सिरिफ तुहंछ फोन रटनु खॉतरुय हररावा पनुन खरुच? बु कुस दनीदास छुस जि गुदोम ह्यू त्रावु मोबाइल नॉल्य तु लुकन त्रावु रोब? बस त्वही हिव्य छिम नफर यिमन सुत्य रुचर पाठ छुम। मे क्वसु सॉ तॉजली छे जि वति पकान ति पेयम फोन करुन?

हे महारा गरी छुस आसान लडायि करान ज़नानि सुत्य, मगर गरि ति छुस नु आसान। त्वहि येमि येमि विजि फोन कोरवु तेलि तेलि ओसुस नु गरि। मगर ग्वडु वॅनिव तोही, क्या गछिव? फोन क्याजि कोरवु? अटु वनोवु बुति जि बु कति ओसुस।

हेमहारा, मे खबर छि जि त्वहि खांदर छुनु ति क्याजि म्याँनी पॉदय छिवु कोर्यन गोबरन नेथर कॅर्यमुत्य। तिम बगवानस हवाल् पनुन्यन पनुन्यन जायन बिहिथ।

तुहंछ जुर—पुथर्य छि वुनि ल्वकुट्य। वुनि परानय, दॅपिव वुनि छटि गटि नेरनय। अकि डींफरि

व्वथान तु अकि बेहान।

हे महारा अपुज वोनमु कॅह? डींफर्यनुय मंज छि ना व्वन्य सॉन्य द्वह राथ गुजरान। तिम वतन प्यठ लॅग्यतन, वानन प्यठ या मंदरन मंज?

मंदरन मंज छना डींफरि लगान? हे कुनि द्वह ति रूज्यतव कुनि मंदरस न्यँबुर कनि तमि विजि येलि तति सुबुच या शामुच आरथी म्वकलि खेजव खेजव वुछिव मरुद क्यो ज़नानु नेरान तु जोरु जोरु कथु करान। साफ ननिवु जि मसलु ओस अँदर्य आरथी करान करानुय वोथमुत तु वुनि छु जेरि बहस।

प्यठु येलि हवन सपदन वोल् या सपद्योमुत आसि। ग्वडु आसन मसलु वॅथ्यमुत्य, तिमन प्यठ आसि दपादफी गॉमुच, पतु आसन ज़ु ग्रुप गॉमत्य, पतु आसि अँक्य ग्रुपन हवन ज़रूर करनस तु बैय ग्रुपन न करनस प्यठ पानुवॉन्य समजूत कोरमुत। मगर ऑखरस आसि मसलु पथ कुन त्रॉविथ हालस हवन करनस प्यठ इकरार गोमुत। तु हवनुक बतु श्रपिथ आसन व्वन्य प्रॉन्य मसलु

बेयि जिंदु गॉमत्य। तु यिथु कॅन्य
आसि अलग अलग डीफर्यन बेयि
जुव चामुत तु जिंदुगियि बेयि जुव
तु जेछर म्यूलमुत।

जिंदगियि हुंज कथ करुना
महारा? ओंखर बु त्यय अँथ्य मंज
शॉमिल छुस तु। मे त्यय छि आसान
यिथी मसलु अँजरावुन्य, बु त्यय
गरि अवय किन्य बाजॉबितगी सान
नेरान छुस तु। बु नय त्वहि अवय
अथि यिवान छुस तु। हवनन अंदर
छु म्योन ति अथिफोल आसान।

हे महारा, नाराज गॅछि ज्यव
नु। तोह्य छिवु इंटेलेक्चुवल। त्वहि
न छे हवनन हुंद इंतिजाम करनस
सोंब तु न तोर गॅछिथ नॅवीद करनस
सोंब फुरसथ। मगर तम्युक मतलब
मा गव जि हवन करुनुय छु गलथ?
तोह्य छिवु वनान जि हवन हसॉ
छि सिरिफ यकजा दालाबताह
ख्यनस अहमियथ दिवान नतु कति
छि व्वन्य दीवी दिवताह ओर
यिवान।

बुति महारा मानु ती। ओर
छु अँस्य सिरिफ दालबतु खेनी
गछान। अदु वॅरियस मंज ओरय

अँस्य द्वन ज्वन मंदरन या आश्रमन
प्यठ हवन करनावान छि तु तिमन
अंदर सामूहिक बतु ख्यवान छि,
त्युतुय छुना कॉफी? मतु यीतन
ओर दीवी दिवताह सालस, हालांकि
तिहुंदी खांतरय ओस पतुवथ यॅगुन्य
जग तु हवन करनु यिवान। मगर
व्वन्य यिम ओर यिवान छि तिम
छा दीवी दिवताहव ख्वतु कम कॅह?
दाल बतु स्योन—अस्यो, त्रकुर वकुर
युथ आसि त्युथ, लूख छि नॅवीद
मॉनिथ अँछन मथान तु ख्यवान।
लवकुट्य क्यो बँड्य, अँमीर क्यो
गरीब, प्रॉन्य बटु क्यो मायग्रंट बटु
सॉरी छि अँकिसुय सबि बेहान तु
नॅवीद ज़ोरूर ख्यवान। ख्यावान
वॉलिस तु सीवाकारस छु न थकुन
बासान तु ख्यनु वॉलिस छुनु सीवा
नु सपदनुक गिलु गछान। किहीं न
तय आरथी विजि अथि फोल ग्टनस
प्यठ छि सॉरी वातान तु कॉशिरि
तरजु क्यन शलूकन तु आरथीयन
हुंज ग्रज तुलान। शलूक परन वॉल्य
छि व्वन्य, बेशक 50 फीसदी ति
कम गॉमत्य, 'ओमजय जगदीश
हरे' ग्यवन वॉल्य ति छि कम गछोन

तोति क्याह गव। अँछ ज़ु वँटिथ
अथि फोल ह्यथ खडा बटु बाँय
क्यो बेनि कमि श्रदायि सान छि
अँगनस ब्रोँठ कनि खडा रोज़ान तु
अथि फोल त्राँविथ सबन मंज़ बेहान,
बडु सबुर तु तोहमुल सान, वाह
वाह... पोज़ पोज़ साँ, अथ नफीस
(ज़न तु फिल्मी) सीनस प्यठ छुसय
बु फिदा गोमुत। बस महारा सिरिफ
अवय खॉतरु छुस बु प्रथ हवनस
गछान। येति बोज़ु हवन छु सपदन
वोल तोत छुस दोरान। हे तिम ति
ज़न मेय प्रारान आसान। मे छि
दिवान बँड ज़िमुदौरी कांह। हतु
यिम काड अन छपाँविथ। गछ यिम
पोस्टर लागुख। गछ अखबार वाल्यन
दि निवुज़। गछ मिनिश्टर साँब अनुन
नीवदस तु आहुती प्यठ। अदु मे
छनु पछ यिवान तु अदु मतु बोज़
तु अथि छुस नु यिवान। हवन
सपद्यथ पतु छे न मे चेट्य। हिसाब
छि तिम पानय करान। इंतज़ामस
छि साम ति तिम पानय ह्यवान।
अदु लडायि ति ज़न करयूख तोति
क्या गव? येलि बानु तु बानु यकजा
थोवख, ठन ठन छु गछानुय।

बु छुस दपान क्याह पँज्य
पाँद्य छा अँस्य यिम हवन अकी
कजि, अकी मेहनतु तु अकी
मकसदु सुत्य यकजा सँमिथ करान?
मे छनु पछ यिवान। मे छु बासान
सिरिफ छि व्वन्य हवनय याँत्य
यिमन मंज़ असि पानु वाँन्य कम
ख्वतु कम मतबीद छु। नतु छि
असि मतबीदुय मतबीद।
पालिटक्सस मंज़ ति, समाजस मंज़
ति, दरमस मंज़ ति तु करमस मंज़
ति। मे छु बासान असि छु व्वन्य
योहोय अख एलसीएम — महारा
यथ ना सानि त्वकुचार ज़ौज़ाफि
अकुल आँस्य वनान। मतबीद याने
'मतभेद' याने इखतिलाफ। मतबीद
छु सोन बडि ख्वतु बोड मकसद।
मतबीद छु सोन बोड बारु तरीकय
कार। मतबीद पज़ि असि पनुनि
जंडुक निशानु बनावुन। छा साँ कांह
आटिस्ट बोयाह युस मतबीदुक कांह
निशानु सूचिथ बनाँविथ हैकि? क्या
साँ गोकल डेंबी जी, तोहय छिवु
काँशिरिस फनी र्यवायतस पोछर
दिवान। ललुवाकन छिवु तस्वीरन
हुंद जामु लागान। तोहय हैकवि

सानि समाजि किस अथ बुनियाँदी यि निशानु क्याजि? यि नक्शि .
 खयालस प्यठ, यथ प्यठ व्वन्य किथु कॅन्य? यिमेन पारटियन मंज
 सोन लसुन बसुन दॅरिथ छु, कांह छु मतबीद साँब ग्वडय आसान
 शकुल दिथ। तोहय बूजिव मतबीदुच विराजमान। तॅमिस छि अति
 स्वंदर तस्वीर कांह बनाँव्यतव। स्व मुस्तकल जाय। व्वंगव हवनन तु
 जायि जायि वातुनावुन्य तु आश्रमन तु मंदर कमीटियन मंज
 मुख्तलिफ डींफर्यन मंज मंजूर छि मतबीद तेलि तेली व्वथान येलि
 करनावुन्य गॅयि म्याँन्य कॉम। कांह नोव तजवीज दिनु यियि, कांह
 खासकर हवन सबायन मंज, नॅव कॉम शोरू करनु यियि। कामि
 आश्रमन मंज तु मंदरन मंज। सियाँसी छु ठोर लगान तु मतबीद ति छि
 जलसन मंज छे यि निशाँनी पानय स्वतान। अवय छे यिमेन मंज ज्यादु
 वाँचमुच तु असुल कॉम करान। कॉम करनुच ज़रूरुथ युथ यिम साँरी
 सान्यन सियाँसी पारटियन मंज छनु हिवी बासन। अकोय रंग लबन।
 ग्वडय कुनि कांह निशाँनी। येम्य महारा व्वन्य व्वन्यतव तोही
 ति कांह निशाँनी या जंडु बनोव जि मे कति छु म्वकजार? क्याह
 तॅमिस तुलिख तुफंगु। कुदुकाक्यव त्वहि ति छा हवन करनुक संज
 ओनहख सवाल कॅर्य कॅर्य जेरु। करुन?

आलव तु मिलुचार

आलव (बंगलूर) तु मिलुचार (मुंबई) छि बाकाँयिदु तु शानदार पॉद्य
 नेरान। खासकर यिहंघ कॉशिर सेक्शन छि मेहनथ तु अर्पनबाव सान
 तयार करनु आमुत्य आसान। व्वंगव यिमेन मैज़ीनन छे कॉशिर्यन लेखकन
 हंदि अथुवासुक ज्यादु ज़रूरुथ बासान तु बतोरि लेखक बामे अँस्य जेमि,
 दिलि या कुनि ति जायि आसव, सोन फर्ज छु यिमेन दूर अलाकन मंज
 कॉशिरिच ज़ितिन्य ज़िंदु थवुन्य तु यिमेन पनुन ल्यखुत लगातार सोजुन।

KASHMIRI LANGUAGE LEARNING MATERIAL

Some of the important course materials presently available for teaching / learning Kashmiri language are :

Publications of Central Institute of Indian Languages, Mysore.

- | | |
|--|---------------------|
| 1. An Intensive Course in Kashmiri | Prof. Omkar N. Koul |
| 2. An Intermediate course in Kashmiri | Prof. Omkar N. Koul |
| 3. An Audio Cassette Course in Kashmiri
(One booklet with 03 cassettes) | Roop Krishen Bhat |
| 4. Let us Learn Kashmiri - Primer and Reader | Roop Krishen Bhat |
| 5. Kashir Kitab-I | Roop Krishen Bhat |
| 6. Kashir Kitab-II | Soom Nath Raina |

DIRECTOR

CIIL (Ministry of HRD, Govt. of India)

Manasgangotri, Mysore - 560 007

Web site : www.ciil.org

Tel. 0821-2345000

Other Publications

- | | |
|---------------------------------------|--------------------------------|
| 1. An introduction to Spoken Kashmiri | Prof. Braj B. Kachru |
| 2. Spoken Kashmiri | Prof. Omkar N. Koul |
| 3. Kashmiri Swayamshikshak | Roop Krishen Bhat |
| 4. Urdu Kashmiri Reader | Roop Krishen Bhat |
| 5. Basic Reader in Kashmiri | M. K. Raina &
Neelam Trakru |
| 6. A Course in Kashmiri Language | Roop Krishen Bhat |

These books can be obtained from the respective authors.

Printed and Published by Sh. Shibani Duda, General Secretary, AIKS for and on behalf of All India Kashmiri Samaj
from D-90, Sarojini Nagar, New Delhi-110023 Phone: 24677114 E-mail: aiksnd@rediffmail.com Printer: Jeoffry and Bell
Publishers, Printers Ph.: 65413585 Telefax: 22047667 Editor: **Ratan Lal Shant**, Managing Editor: **Dr. R. K. Bhat**

CC-0. Bhushan Lal Kaul Jammu Collection. Digitized by eGangotri

Price : Rs. 30/-